

Mathayo

JANDIKO: Mathayo

KAR NDIKO: Palestina

KINDE NDIKO: 60 - 65 E YIK RUOTH (AD)

Gik Manie Iye

Injili mar Mathayo mondiki gi Mathayo mane en jasol osuru. En e achiel kuom ji mane Yesu oluongo mokuongo e kinde mane ochako tichne kendo en janeno wang' gi wang' kuom tije mang'eny mane Yesu otimo.

Kitabuni ochak ndike kinyisogo kuom nyuol Yesu gi Bikira Maria, batisone gi temne e thim. Yesu nobiro koyalo kuom pinyruodh polo gi, donjo e ngima manyaka chieng'. Polo idonje mana kuom lokruok e richo kod yie. Mathayo otweyo puonj mag Yesu e migepe abich magin tim, lando Injili, ngeche, lalruok kod pinyruodh polo. Tho kod chier mar Yesu ema Injilini orumogo kopuonjo mondo wadhi e piny duto waland Injili mar Yesu Kristo.

THORRO

Gima duong' mane omiyo Mathayo ondiko kitabuni en nine opuonjo ni Yesu ema ochopo singruok manie Muma Machon. Mae emomiyo kitabuni nyisoni Yesu oa e koth Ruoth Daudi kaachiel gi Abraham. (1:1), kendo Mathayo otiyo ni weche mang'eny mokor manie Muma Machon konyiso godo adimba kuom ngima mar Yesu. Yesu nobiro kaka Jawar mar Jo-Yahudi 1:21, dhout ogendini 4:13-16, to mogik to en Jawar mar piny 28:19. Tim kod kido mar oganda mar pinyruodh polo iyudo kondikie Injili mar Got 5-7 kama timbe mag piny ok nyal to pinyruodh polo gi wachne makare kende emani kod teko 6:33.

WECHE MOCHAN KAE GIN:

1. Nyuol Yesu kod tichne 1:1-4:25
2. Injili e got 5:1 -7:29
3. Puonj mopogore opogore, weche gi weche mamoko 8:1-18:35
4. Wuoth madhi Jerusalem kod siem mogik 19:1-23:29
5. Weche mokor kuom ndalo mag giko 24:1-25:46
6. Tho kod chier 26:1-28:20

Nonro Mar Anywola Mar Yesu

1 Ma e kaka anywola mar Yesu Kristo ma wuod Daudi kendo wuod Ibrahim chalo:

²Ibrahim ne en wuon Isaka, Isaka ne en wuon Jakobo, to Jakobo ne en wuon Juda gi owetene.

³Juda ne en wuon Perez gi Zera, ma min-gi- ne en Tamar, Perez ne en wuon Hezron, Hezron ne en wuon Ram,

⁴to Ram ne en wuon Aminadab. Aminadab ne en wuon Nashon, Nashon ne en wuon Salmon,

⁵Salmon ne en wuon Boaz, ma min-gi ne Rahab. Boaz ne en wuon Obed ma min-gi ne Ruth, Obed, ne en wuon Jese,

⁶to Jese ne en wuon Ruoth Daudi. Daudi ne en wuon Solomon, ma min-gi, kane pok Daudi okawe, ne en chi Uria,

⁷Solomon ne en wuon Rehoboam, Rehoboam ne en wuon Abija, to Abija ne ne wuon Asa.

⁸Asa ne en wuon Jehoshafat, Jehoshafat ne en wuon Jehoram, Jehoram ne en wuon Uzia,

⁹to Uzia ne en wuon Jotham, Jotham

ne en wuon Ahaz, Ahaz ne en wuon Hezekia

¹⁰to Hezekia ne en wuon Manase. Manase ne en wuon Amon, Amon ne en wuon Josia,

¹¹to Josia ne en wuon Jekonia gi owetene, e kinde mag twech e piny Bablon.

¹²Bang' twech e Bablon: Jekonia ne en wuon Seltiel, Seltiel ne en wuon Zerubabel,

¹³Zerubabel ne en wuon Abiud to Abiud ne en wuon Eliakim. Eliakim ne en wuon Azor,

¹⁴Azor ne en wuon Zadok, Zadok ne en wuon Akim, to Akim ne en wuon Eliud.

¹⁵Eliud ne en wuon Eleazar, Eleazar ne en wuon Mathan, Mathan ne en wuon Jakobo,

¹⁶to Jakobo ne en wuon Josef mane en chwore Maria mane onywolo Yesu, milu-ongo ni Kristo.

¹⁷Kamano tienge duto mane nitie chakre Ibrahim nyaka Daudi gin apar gang'wen; chakre Daudi nyaka ndalo twech e Bablon, tienge apar gang'wen, kendo chakre ndalo twech nyaka kinde mag Kristo bende tienge apar gang'wen.

Nywol Mar Yesu Kristo

¹⁸Kama e kaka nywol mar Yesu Kristo notimore: Noyudo min mare ma Maria osesingi ne Josef mondo okende, to kane pok gibedo kaachiel, noyude ka en gi nyathi kuom Roho Maler. ¹⁹Nikech Josef chwore ne en ng'ama kare, kendo ne ok odwar miyo ji kuod wiye, nochano e pache mar weyo kende ling' ling'.

²⁰To bang' paro mar timo kamano, Malaika mar Ruoth nofwenyorene e lek mowacho ni, "Josef wuod Daudi, kik iluor dhi gi Maria dala kaka chiegi, nikech gima oting'o e iye oa kuom Roho Maler. ²¹Obiro nywolo wuowi, kendo nyaka imiye nying ni Yesu, nikech obiro 'waro joge kogolo e richogi.

²²Magi duto notimore mondo ochop

gimane Ruoth owacho gi dho janabi ni, ²³"Nyako ngili, nomak ich mi nonywol wuowi, kendo giniluonge ni Imanuel"-ma tiende ni, "Nyasaye kodwa."

²⁴Kane Josef ochiew, notimo gima malaika mar Ruoth nochike mondo otim, kendo nokawo Maria odhigo dala mobedo chiege. ²⁵To ne ok oriwore kode nyaka bang' kane osenyuolo nyathi ma wuowi kendo nomiye nying ni Yesu.

Limbe Mar Joma Riek

2 Bang' kane osenywol Yesu Bethlehem e piny Judea, e ndalo mag Ruoth Herode, Joma Riek moa Yo wuokchieng' nobiro Jerusalem, ²mi openjo ni, "Ere jal mosenywol mondo obed Ruodh jo- Yahudi? Ne waneno sulwe mare yo wuokchieng' kendo wasebiro mondo walame."

³Kane Ruoth Herode owinjo wachno, chunye nochandore, en kaachiel gi ji duto modak Jerusalem. ⁴Kane oseluongo jodolo madongo gi jopuonj chik duto mane otelo ne ji, nopenjogi kama nowinjore nywolie Kristo. ⁵To gin ne gidwoke ni, "E Bethlehem manie piny Judea, nikech janabi nondiko kama: ⁶"To in, Bethlehem, manie piny Judea, ok itin ngang' e dier joloch mag Juda; nikech kuomi ema jaloch biro ae, mabiro kwayo joga ma jo-Israel"

⁷Eka Herode noluongo joma riekgo ling'ling', kendo ne ononogi, mi neginyise saa nogono mane sulwe onenoree. ⁸Ne oorogi Bethlehem, kowacho ni, "Dhiuru kendo umany nyathino maber. E sama uyudeno to duognauru wach mondo an bende adhi alame."

⁹Kane gisewinjo wach ruoth, ne gimako wuodhgi gidhi, kendo sulwe mane oyudo giseneno yo wuok cheing' notelo nigi nyaka nochopo mi ochung' e wi kamane nyathi nitie. ¹⁰Kane gineno sulweno, ne gibedo moil mokalo. ¹¹To kane gichopo ei ot, ne gineno nyathino kod Maria min mare, kendo ne gikulore piny ka gilame. Bang'e ne giyawo mwandugi kendo ne gimiyee mich mag dhahabu, gi

ubani gi manemane. ¹²To kaka nosesiem-gi e lek ni kik gidog ir Herode, ne gidok thurgi gi yo machielo.

Tony Dhi Misiri

¹³Bang' kane gisedhi, malaika mar Ruoth nofwenyore ne Josef e lek. Nowachone ni, "A malo ikaw nyathi gi min mare mondo itony idhi Misiri. Dag kuno nyaka aduogni wach, nikech Herode biro manyo nyathini mondo onege."

¹⁴Omiyo noa malo gotieno mi okawo nyathi gi min mare kendo nowuok modhi Misri, ¹⁵kuma nodakie nyaka chop tho mar Herode. Kamano gima Ruoth nowachon gidho janabi ni, "Ne aluongo wuoda ka agolo Misri," nochopo kare.

¹⁶Ka Herode nofwenyo ni joma Riekgo nosewuonde, iye nowang' asasa, kendo nogolo chik mondo onegi nyithindo ma yawuowi duto modak Jerusalem gi mier malwore, mane hikgi ariyo kadok chien, kaluwore gi saa mane Joma Riek onyise. ¹⁷Eka gima Nyasaye nomiyo janabi Jeremia owacho nochopo kare:

¹⁸"Duol winjore Rama, en ywak gi nduru maduong' Rael ywago nyithinde kendo odagi ni ok hoye, nikech gisetho."

Dok Nazareth

¹⁹Bang' ka Herode nosetho, malaika mar Ruoth nofwenyore ne Josef e lek ka en Misri kuno, ²⁰kendo nowachone ni, "Aa malo ikaw nyathi kod min mare mondo idhi e piny Israel, nikech joma netemo kawo ngima nyathi osedhi."

²¹Omiyo noa malo, mokawo nyathi gi min mare, kendo nodhi e piny Israel. ²²To kane owinjo ni Arkelao nobet e loch e piny Judea kar wuon-gi ma Herode, noluro dhi kuno. Kaka nosesieme e lek, noloko wuoth modhi e gweng' mar Galili, ²³kendo nodhi modak e taon miluongo ni Nazareth. Kamano gima nowachi gi dho janabi ni, "Enoluonge ni ja Nazareth," nochopo kare.

Johana Ja-Batiso Oloso Yo

³E ndalogo Johana ja Batiso nobiro, koyalo e Thim mar Judea, ²kendo owacho ni, "Lokreuru, nikech Loch polo ni machiegni." ³Ma e jalo mane owuo kuome gidho janabi Isaya ni:

"Dwond ng'at makok e thim ni, 'Losuru yo ne Ruoth, losneurur yore moriere tir.'"

⁴Lep Johana nochwe gi yie ngamia, kendo notweyo kamba mar pien e nungone. Chiembe ne gin bonyo gi mor kich mag bungu. ⁵Ji nowuok odhine koa Jerusalem gi Judea duto koda ka gweng' Jordan duto. ⁶Kane gihulo richogi, ne obatisogi e Aora Jordan.

⁷To kane oneno jo Farisai gi jo Sadukai ka biro kama ne obatiso ji, nowachone ni: "Un koth thunodegi! En ng'a mane osiemou mondo uring utony ne mirima mager mabiro? ⁸Nyaguru olemo manyiso ni uselokoru adier. ⁹Kendo kik upar ni unyalo wacho ne un uwegi ni, 'Wan-gi Ibrahim kaka wuonwa.' Anyisou ratiro ni Nyasaye nyalo loso ne Ibrahim nyithindo kogolo e kitegi. ¹⁰Le koro oseketi e tie yiende, kendo yien ka yien ma ok nyag olemo ibiro tong' mi go piny kendo witi e mach.

¹¹An abatiso gi pi mar lokruok. To ng'ato biro biro bang'a ma tekre ng'eny moloya, ma kata akande ok awinjora ting'o. En obiro batiso gi Roho Maler kod mach. ¹²Odheche mar pietho nie lwete, kendo obiro yweyo kare mar dino cham, lochoko ngano mage okano e dero, to mihudhi to owang'o gi mach maok nyal negi."

Batiso Mar Yesu

¹³Eka Yesu nobiro koa Galili nyaka Jordan mondo Johana obatiso. ¹⁴To Johana notemo tame, kawacho ni, "Ikelo biro ira nade to an ema adwaro mondo ibatisa?"

¹⁵Yesu nodwoko ni, "We otimre

kamano sani; en gima ber ne wan kodi mondo watim ma, eka wachop tim makare duto.” Eka Johana noyie.

¹⁶Kane osebatis Yesu nii to nowuok oa ei pi. To sanosano polo noyawore kendo noneno Roho mar Nyasaye, ka lor kaka akuru, kendo piyo kuome. ¹⁷To duol moro moa e polo nowacho ni, “Ma en wuoda, ma ahero, kendo chunya mor kode.”

Tem Mar Yesu

A Eka Roho notelone Yesu nyaka e thim mondo Jachien oteme. ²Bang’ tweyo chiemo kuom odiechienge piero ang’wen gi otieno piero ang’wen, kech nochako kaye. ³Jatem nobiro ire kendo owacho ni, “Ka in Wuod Nyasaye to nyis kitegi mondo gilokre kuon.”

⁴Yesu nodwoko ni, “Ondiki ni: ‘Dhano ok bed mangima nikech kuon kende, to nikech wach ka wach moa e dho Nyasaye.’”

⁵Eka jachien nokawe motere nyaka Dala Maduong’ Maler, kendo nochunge e osuch Hekalu malo-malo mogik. ⁶Nowachone ni, “Dirri piny, nikech ondiki ni,

“Obiro chiko malaikege kuomi, kendo gibiro ting’i malo e lwetgi, mondo kik ichwany tiendi e kidi.”

⁷Yesu nodwoke ni, “Ondiki bende ni, Kik iket Ruoth Nyasachi e tem”

⁸Jachien nokawe kendo, motere nyaka ewi got moro ma rabora ahinya, kendo nonyise pinje ruodhi mag piny gi duong’ mane gin-go. ⁹Nowacho ni, “Magi duto abiro miyi ka ikulorina piny kendo ilama.”

¹⁰Yesu nowachone ni, “Dhi kucha, Satan! Nikech ondiki ni, ‘Ruoth Nyasachi kende ema nyaka ilam kendo itine.’”

¹¹Eka Jachien noweye, kendo malaike nobiro mokonye.

Yesu Ochako Yalo

¹²Ka Yesu nowinjo ni Johana nosetwe

e jela, nodok Galili. ¹³Nodar Nazareth modhi odak Kapernaum, mane nie dho nam e gweng’ mar Zebulun gi Naftali, ¹⁴mondo ochop gima nowachi gi dho jan-abi Isaya ni:

¹⁵“Piny Zebulun gi piny Naftali, yo moluwo tie Jordan kochomo nam, Galili mar ogendini ¹⁶joma odak e mudho oseneno ler maduong’; joma odak e piny ma tiper mar tho oumo, ler osechopo negi”

¹⁷Chakre kindeno kadhi nyime, Yesu nochako yalo ni, “Lokreuru nikech pinyruodh polo ni machiegni.”

Luong Mar Jopuonjre Mokwongo

¹⁸Kane oyudo Yesu wuotho e gweng’ Nam Galili, noneno owete ariyo, Simon milwongo ni Petro gi owadgi ma Andrea. Noyudo gibolo gokgi e nam, nimar ne gin jolupo. ¹⁹Yesu nowachonegi ni, “Biuru uluwa mondo ami ubed joywa ji.” ²⁰Ne giweyo gokegi sanosano mi giluwe.

²¹Kane ochwalore nyime koa kanyo, noneno owete ariyo mamoko, Jakobo wuod Zebedi gi owadgi ma Johana. Ne gin e yie kaachiel gi wuon-gi ma Zebedi, ka giiko gokegi. Yesu nolwongogi, ²²kendo ne giweyo yie kod wuon-gi sanosano mi giluwe.

Yesu Ochango Joma Tuo

²³Yesu nodhi e gweng’ Galili duto, kopuonjo e sunagokegi, koyalo Wach Maber mar pinyruoth kendo kochango kit tuoche gi midekre duto e dier ji. ²⁴Humbe nolandore e piny Siria duto, kendo ji nokelone joma ne tuo gi kit tuoche may-ore yore gi joma ne nigi rem mapek gi joma ne nigi jochiende gi joma ne chuny-gi yudhore kod joma ne nigi athany, kendo nochangogi. ²⁵Oganda makwar moa Galili gi gweng’ mar Dekapoli gi Jerusalem gi Judea kod gweng’ man loka Jordan ne luwe.

Kit Joma Ogwedhi

5 Koro kane oneno oganda maduong' mar ji, nodhi e bath got mi obet piny. Jopuonjrene nobiro ire,

²kendo nochako puonjogi, kowacho niya ³Joma odhier gie chunyi gi gin joma ogwedhi, nimar pinyruodh polo en margi. ⁴Joma ywak gin joma ogwedhi, nimar ibiro hoyogi. ⁵Joma muol gin joma ogwedhi nimar piny nobed girkeni margi. ⁶Joma kech kayo kendo riyo oloyo nikech gidwaro tim makare gin joma ogwedhi, nimar gibiro yieng'. ⁷Joma kecho ji gin joma ogwedhi, nimar ibiro kechgi. ⁸Joma ler gie chunyi gi gin joma ogwedhi, nimar ginine Nyasaye. ⁹Jokel kuwe gin joma ogwedhi, nimar noluong-gi ni yawuot Nyasaye. ¹⁰Joma isando nikech tim makare gin joma ogwedhi nimar pinyruodh polo en margi.

¹¹Ka ji yanyou kendo sandou kendo hangonu wach ni usetimo kit gik maricho duto nikech an, to un joma ogwedhi. ¹²Beduru moil kendo mamor, nikech mich maru duong' e polo, nimar jonabi mane okuongonu bende ne gisando mana kamano.

Chumbi Gi Ler

¹³Un e chumbi mar piny. To chumbi ka ndhathe orumo, to ere kaka dochak obed gi ndhath chumbi kendo? Koro onge konyruok mokelo, makmana ni ipuke oko kendo ji nyone piny gi tiendegi.

¹⁴Un e ler mar piny. Taon moger ewi thur ok nyal pandi. ¹⁵Kamano bende, ji ok mok taya kaeto gikete e bwo sufuria. Kar timo kamano to giliere malo e yiende modhi malo monego ong'awe, eka ochiwo ler ne ji duto manie i ot. ¹⁶Un bende timuru kamano. Neuru ni ler maru rieny e dier ji, mondo gine timbeu mabeyo kendo gipak Wuonu manie polo.

Chopo Chik

¹⁷Kik upar ni asebiro mondo atiek Chik kata Jonabi. Ok asebiro mondo atiek-gi, to asebiro mar chopogi. ¹⁸Awachonu

adier ni nyaka chop chieng' ma polo gi piny nolal nono, onge nukta matin mogik kata alama moro amora mar kalam ma nolal kuom Chik, nyaka chop gik moko duto chop kargi. ¹⁹Ng'ato ang'ata moketho achiel kuom chike matindoe mogik kuom Chikegi, kendo mopuonjo joma moko mondo otim kamano, nokaw kaka ng'ama nichien mogik e pinyruodh polo, to ng'ato ang'ata maluwu kendo puonjo ji chikegi nokaw kaka ng'ama duong' e pinyruodh polo. ²⁰Nimar akonu ni ka ok ber maru oyombo mano mar jo Farisai gi mar jopuonj chik to ok unudonji e pinyruodh polo ngang'.

Nek

²¹Usewinjo ni ne owachne joma chon ni, 'Kik ineki, kendo ng'ato ang'ata moneko ibiro ng'adne bura. ²²Anto anyisou ni ng'ato ang'ata ma mirima omako gi nyawadgi ibiro ng'adne bura. Bende, ng'ato ang'ata mowacho ne nyawadgi ni, 'Raka' nyaka yal e buch jo Sanhedrin. To ng'ato ang'ata mowacho ni, 'Ifuwo nade,' biro neno chandruok mar mach mar Gehena.

²³Kuom mano, ka ichiwo michni e dho kendo mar misango to iparo ka in kanyo ni nyawadu nikodi gi wach, ²⁴to we michnino piny kanyo e nyim kendo mar misango. Kwong idhi ilos kindi gi nyawadu; eka ibi ichiwo michni.

²⁵Los weche piyopiyo gi jasiki madwa teri e od bura. Tim kamano kapod un kode e yo, nono to onyalo keti e lwet jang'ad bura kendo jang'ad bura nyalo boli e lwet polis, kendo inyalo rwaki e jela. ²⁶Awachoni adier ni kuno koserwakie to ok ibi wuokie nyaka chop ichul faini duto monego ichul ma ok orem kata nduru.

Terruok

²⁷Usewinjo ni nowachi ni, 'Kik iterri,' ²⁸Anto anyisou ni ng'ato ang'ata morango ng'ama dhako ka ogombe oseterore kode gie i chunye. ²⁹Ka wang'i ma korach-wich miyo itimo richo to lodhe oko kendo

iwite kucha. Ber molooyo ka iwito fuonni achiel mar ringri molooyo ka ringri duto owiti e gehena. ³⁰Kamano bende ka lweti makor kachwich miyo itimo richo, to ng'ade oko iwite kucha. Ber molooyo ka iwito fuonni achiel molooyo ka ringri duto odhi e gehena.

Ketho Keny

³¹"Osewachi ni, ng'ato ang'ata moketho keny gi chiege nyaka miye satifiket mar ketho keny. ³²Anto awachonu ni ng'ato ang'ata moketho keny gi chiege makmana kuom wach mar miganga mar kend, to omiyo chiege be terore, kendo ng'ato ang'ata mokendo dhako makamano bende oterore.

Kuong'ruok

³³"Usewinjo bende ni nowachi ne joma chon ni, "Kik iketh kuong'ruok, to riti kuong'ruok moro amora misetimo ne Ruoth Nyasaye." ³⁴Anto anyisou ni kik ukwong'ru kata matin: Kik ukuong'ru gi polo ni mar en e kom loch mar Nyasaye; ³⁵kata gi piny, nimar en e kome moyieye tiende; kata gi Jerusalem, nikech en e dala mar Ruoth Maduong'. ³⁶Kendo kik ukuong'ru gi wiu, nikech ok unyal loko yie wich achiel rachar kata rateng'. ³⁷Neuru ni 'Ee' maru obedo 'Ee', kendo 'ooyo' obedo 'ooyo'. Gimoro amora mokalo mano en gima oa kuom Ng'ama Rach.

Wang' Kar Wang'

³⁸"Usewinjo ni nowachi ni, 'Wang' kar wang' kendo lak kar lak'. ³⁹Anto anyisou ni kik ubed gi ng'ama rach. Ka ng'ato othalo lembi makorachwich to lokne komachielo bende, ⁴⁰kendo ka ng'ato dwa yako kodi mi okawo lawi mar akor to wene jakedi bende. ⁴¹Ka ng'ato ochuni mondo ikowe mael achiel to dhi kode mael ariyo. ⁴²Ka ng'ato okwayou gimoro to miyeuru, kendo kik ulok kitu ne ng'at madwaro ni uhole gimoro.

Hero Wasigu

⁴³"Usewinjo ni nowachi ni, Her owadu to jasiki to isin-go ⁴⁴Anto awachonu ni: Heruru wasiku kendo lamuru ne joma sandou, ⁴⁵mondo eka ubed yawuot Wuonu manie polo. En omiyo chieng' mare wuok ne joma richo gi joma beyo machalre, kendo ooro koth ne joma kare gi joma ok kare. ⁴⁶Ka uhero mana joma oherou kende to pok mane muyudo? Donge kata josol osuru bende timo mano? ⁴⁷Koso ka umoso mana oweteu kende to en ang'o mutimo molooyo joma moko? Donge kata joma ok lem be timo mano? ⁴⁸Kuom mano, beduru malong'o chuth mana kaka Wuonu manie polo long'o chuth.

Chiwone Joma Ochando

6 'Beduru motang' mondo kik utim 'timbeu makare' e nyim ji, mondo eka gineu. Kutimo kamano to ok ubi yudo pok moa kuom Wuonu manie polo.

²"Kuom mano kuchiwo kony ne joma ochando to kik uland gima utimo gi tung', kaka joma wuondore timo ei sunagoke kendo e yore manie kind mier, mondo ji omigi luor. Anyisou adier ni gin giseyudo pokgi duto. ³To in, kichiwo kony ne joma ochando to kik iyie lweti makor acham ng'e gima lweti makorachwich timo, ⁴mondo chiwo mari obed maling'ling'. Eka Wuonu maneno gima ochiw ling'ling' nomiyi pokni.

Lamo

⁵"Bende kulamo to kik uchal gi joma wuondore, nimar gihero lamo ka gichung' ei sunagoke, kendo e akek yore mondo ji onegi. Awachonu adier ni giseyudo pokgi duto. ⁶To in, kilamo to donji e odi maiye, kaeto ilor dhoot eka ilam Wuonu ma ok ne. Eka Wuonu maneno gima otim ling'ling' nomiyi pokni. ⁷To kulamo to kik usik kunuoyo weche kayiem kaka jopiny, nimar giparo ni ibiro winjgi nikech

wechegi mathoth. ⁸Kik uchal kodgi, nikech Wuonu ong'eyo gik muchando kata kapok ukwaye.

⁹Koro kama e kaka onego ulam: "Wuonwa manie polo, nyingi mondo omi luor; ¹⁰Pinyruodhi mondo obi, dwaroni mondo otimre e piny kaka timore e polo. ¹¹Yie imiwa kawuono chiembwa mapile pile. ¹²Wenwae gopewa, kaka wan bende waseweyo ne jogopwa. ¹³Bende kik iterwa e tem, to reswa e lwet Ng'ama Rach.' ¹⁴Nimar ka uweyo ne ji ka gikethonu eka Wuonu manie polo biro weyonu. ¹⁵To ka ok uwene ji richogi to wuonu manie polo ok bi weyonu richou.

Tweyo Chiemo

¹⁶Ka utweyo chiemo to kik unen malich kaka joma wuondore timo, nimar gimieno wengegi mondo ginyis ni gitweyo chiemo. Awachonu adier ni giseyudo pokgi duto. ¹⁷To in, kitueyo chiemo to ket mo e wiya kendo lwok wang'i, ¹⁸mondo kik obed gima ong'ere ne ji ni itweyo chiemo, to Wuonu ma ok ne kende ema ong'e. Eka Wuonu maneno gima otim ling'ling' nomiyi pokni.

Mwandu Manie Polo

¹⁹Kik ukan mwandu ne un uwegi e piny kama olwenda gi nyal kethoe gik moko, kendo kama jokuoge turoe kendo kweloe. ²⁰To kanuru mwandu ne un uwegi e polo kama olwenda kata nyal ok kethie gik moko kendo jokuoge ok turie ma kwelie, ²¹nimar kama mwanduni nitie e kama chunyi be biro betie.

²²"Wang' e taya mar del. Ka wengeni neno maber to dendi duto biro pong' gi ler. ²³To ka wengeni richo to dendi duto biro pong'gi mudho. Omiyo ka ler manie iyi en mudho, to mano kaka en mudho maduong' miwuoro!

²⁴"Onge ng'ama nyalo tiyo ne ruodhi ariyo. Ka ng'ato otimo kamano to obiro chayo achiel to ohero machielo, kata onyalo chiwore ne achiel molojo to machielo to ok odew. Ok unyal tiyo ne Nyasaye

kendo utiyo ne pesa.

Kik Uluor

²⁵"Emomiyo anyisou ni, kik uparru kuom ngimau, kuom gik mubiro chamo kata madho; kata kuom dendu, korka gik mubiro rwako. Donge ngima duong' molojo chiemo, koso del donge duong' molojo lewni? ²⁶Ranguru ane winy ma huyo e kor polo. Ok gikom kata gike kata giken e dere, to eka Wuonu manie polo pod pidhogi apidha. To un donge un gi nengo mamalo molojogi? ²⁷En ng'a kuomu ma parruok moparorego nyalo miyo omed bedo mangima kata mana kuom saa achiel kende?

²⁸"Koso uparoru ne wach lewni nang'o? Neyeuru kaka ondanyo mag pap dongo. Ok ginyagre gi tich kata gi chwecho. ²⁹To anyisou ni kata mana Solomon e duong'ne duto ne ok orwakore ka achiel kuomgi. ³⁰Ka kamano e kaka Nyasaye rwako lum aluma manie pap, ma kawuono nitie to kiny to iwito e mach, donge obiro rwakou maber molojo, yaye un joma yiegi tin-gi? ³¹Omiyo kik uparru kuwacho ni, 'Wabiro chamo ang'o?' kata ni, wabiro rwako ang'o? ³²Nimar jo-piny ema chandore ka lawo gigi duto; to bende Wuonu manie polo ong'eyo ni udwaro gigi duto. ³³To mokwongo, dwaruru pinyruodhe kod timne makare eka gigi duto bende nomiu kaachiel gi mago. ³⁴Kuom mano, kik uparru kuom kiny, nikech kiny noparre kuome owuon. Odiechieng' kodiechieng' nigichandruokne morome.

Ng'ado Ne Ji Bura.

7 "Kik ung'ad ne ji bura, nono to un be ibiro ng'adnu bura. ²Nimar kaka ung'ado ne ji mamoko bura e kaka ibiro ng'adnu bura un bende, kendo rapim mupimogo ema ibiro pinnugo un bende.

³"Ang'o momiyo ing'iyu ng'injo mar buch bao manie wang' owadu to pilni maduong' mar bao manie wang'i iwuon to ok idew? ⁴Ere kaka inyalo wacho ne owadu ni, 'We agolni ng'injo mar buch

bao manie wang'i, ka into pilni maduong' mar bao osiko ngolni e wang'i iwuon? ⁵In ng'ama wuondoreni, kuong igol oko pilni maduong' mar bao manie wang'i iwuon, eka ibiro neno maber mar golo oko ng'in-jo mar buch bao manie wang' owadu.

⁶"Kik umi guogi gima ber; bende kik udirne anguro kiteu ma nengogi tek. Kutimo kamano to ginyalo nyonogi piny e bwo tiendegi mi gilokre kodu kendo gikidhu matindo tindo.

Kwa, Dwar, Dwong'

⁷"Kwauru eka gima ukwayono nomiu; dwaruru eka unuyud gima udwaro; dwong'uru eka noyawnu dhoot. ⁸Nimar ng'ato ka ng'ato makwayo imiyo; ng'at madwaro yudo; kendo dhoot ibiro yaw ne ng'at madwong'o.

⁹"En ng'a kuomu ma kawuode okwayo kuon to onyalo miye kidi? ¹⁰Kata ka okwayo rech to omiye thuol? ¹¹Koro, ka un, ma un joma richo, ung'eyo miyo nyithindu mich mabeyo, Wuonu manie polo donge nyalo chiwo ne joma kwaye mich mabeyo dimang'e-ny! ¹²Omiyo, e gik moko duto, timuru ne joweteu gik ma duher mondo gin bende gitimnu, nikech mano e tiend Chik gi Jonabi.

Dho Rangach Madiny Kod Dho Rangach Malach

¹³"Donjuru gi e dho rangach madiny. Nimar rangajno oyarore kendo yorno lach madhi e kethruok, kendo ji mathoth donjo koluwe. ¹⁴To rangajno tin kendo yorno diny matero ji e ngima, kendo mana joma nok kende ema yude.

Yien Kod Olembegé

¹⁵"Tang'uru gi jonabi mag miriambo. Gibiro iru ka girwako lep rombe, to gi e igi to gin ondiegi mangemo. ¹⁶To kit olemo ma ginyago ema ubiro ng'eyo gigo. Be ji pono olemb mzabibu e yiend kudho, kata olemb ng'owo kuom oriang'? ¹⁷Kamano bende e kaka yien maber nyago

olemo maber, to yien marach nyago olemo marach. ¹⁸Yien maber ok nyal nyago olemo marach, kendo yien marach ok nyal nyago olemo maber. ¹⁹Yien ka yien maok nyag olemo maber itong'o igoyo piny kendo iwito e mach. ²⁰Omiyo kit olemo ma ginyago ema ubiro ng'eyo-gigo.

²¹"Ji duto ma wachona ni, 'Ruoth, Ruoth,' ok nodonji e polo, to mana ng'ama timo dwaro mar Wuora manie polo ema nodonji. ²²Ji mang'eny nowachna e odiechiengno ni, 'Ruoth,Ruoth, donge ne wakoro wach e nyingi, kendo e nyingi donge emane wariembogo jochiende kendo watimogo honni mang'eny?' ²³To ana nyisgi e wang'gi ni, 'Akiaw nyaka aa chakruok, ayiuru e nyima, un joma timo richogi!'

Jogedo Mariek Gi Jogedo Mofuwo

²⁴"Emomiyo ng'ato ang'ata mawinjo wechenagi kendo timo kaka giwacho chalo gi ng'ama riek mane ogero ode e lwanda. ²⁵Koth nochwe maduong', aoche nopong' motak, kendo yamo nokudho matek mogoyo odno; to kata kamano ne ok opodho, nikech mise mare ne nie lwanda. ²⁶To ng'ato ang'ata mawinjo wechenagi to ok tim kaka giwacho chalo gi ng'at mane ogero ode e kwoyo. ²⁷Koth nochwe maduong', aoche nopong' motak kendo yamo nokudho matek mogoyo odno, mi noruombore piny gi ruombuok matek."

²⁸Kane Yesu osetieko wacho gigi, oganda nowuoro puonjne, ²⁹nikech nopuonjo kaka ng'ama ne nigi teko, to ok kaka jopuonjgi mapile mag chik.

Ng'at Man-gi Dhoho

8 Kane olor piny koa e bath got malo, oganda maduong' ne luwo bang'e. ²Ng'at moro man-gi dhoho nobiro mogoyo chonge piny e nyime, kendo nowachone ni, "Ruoth, kiyie to inyalo pwodha."

³Yesu norieyo bade kendo nomulo ng'atno. Nowacho ni, "Ayie, pwodhri!"

Sanosano, nochange kuom dhohone. ⁴Eka Yesu nowachone ni, “Ne ni ok inyiso ng’ato wachni. To dhiyo mondo inyisri ne jodolo, kendo ichiw mich mane Musa ochiko, mondo mano obed negi kaka neno.”

Yie Mar Ja-Kenturo

⁵Ka Yesu nosedonjo ei Kaper naum, ja Kenturo moro nobiro ire, kakwaye kony. ⁶Nowacho ni, “Ruoth, jaticzna aweyo koriere piny dala, ka ok onyal chuth, kendo kowinjo marach moloyo.”

⁷Yesu nowachone ni, “Abiro dhi mi achange.”

⁸Ja-Kenturo nodwoko kawacho ni, “Ruoth, ok awinjora dhi kodi e bwo tat oda. To wach mana wach mowinjore kende, to jaticzna biro chango. ⁹Nimar an bende an ng’ama nie bwo teko mar jotenda, kendo an-gi jolweny manie bwoya. Ka akone moro ni, ‘Dhiyo’, to odhi; kendo ka akone machielo ni, ‘Bi, to obiro. Bende, ka anyiso misumbana ni, ‘Tim ma’, to otime.”

¹⁰Kane Yesu owinjo wach ng’atno, nohum nono kendo nowacho ne joma ne luwo bang’e ni, “Awachonu adier ni pok ayudo kata ng’at achiel e piny Israel ma niggi yie maduong’ machal kama. ¹¹Awachonu ni ji mang’eny biro biro koa wuok chieng’ gi podho chieng’ kendo gini kaw keregi kaachiel gi Ibrahim, Isaka gi Jakobo e nyasi mar chiamo manobed e pinyruodh polo. ¹²To jokanyo mag pinyruoth to nodir oko e mudho mandywa, kama ji noy wagre malich ka gimuodo lekegi.”

¹³Eka Yesu nowachone ja-Kenturo ni, “Dhiyo! Dhi timoreni mana kaka iseyie ni notimreno.” Kendo jaticzne nochango’ e saa nogono.

Yesu Ochang’o Ji Mang’eny

¹⁴Ka Yesu nobiro ei od Petro, nonono maar Petro konindo e otanda, ka en-gi midhusi. ¹⁵Nomulo lwete mi midhusi noweye, kendo noa malo mochako pidhoga.

¹⁶Ka nochopo odhiambo, nokelne ji mathoth mane niggi jochiende, kendo noriembo chunjego oko gi wach, kendo nochango ji duto mane tuo. ¹⁷Mano notimore mondo ochop gima nowachi gi dho Janabi Isaya ni:

“Nokawo nyosruok marwa kendo noting’o tuocheva.”

Nengo Mar Luwo Yesu

¹⁸Ka Yesu noneno oganda maduong’ kolwore, nogolo chik mondo ging’ad nam gidhi bathe koma chielo. ¹⁹Eka japuonj chik nobiro ire mowachone ni, “Japuonj, abiro luwi kamoro amora midhiye.” ²⁰To Yesu nodwoke ni, “Bweche niggi buche kendo winy mahuyo e kor yamo niggi utegi, to Wuod Dhano onge gi kamoro amora monyalo kete wiye.”

²¹Jalupne machielo nowachone ni, “Ruoth, yiena adhi ayik wuonwa mondi.”

²²To Yesu nokone ni, “In luwa, kendo we joma otho oik jogegi motho gin giweggi.”

Yesu Okweyo Ahiti

²³Eka nodonjo e yie kendo jopuonjrene noluwe. ²⁴To ka gir kirage, kodh yamo mager nobukore e nam, mi apaka noyuyo yie. To Yesu noyudo nindo otero. ²⁵Jopuonjrene nodhi mochiewe, ka giwachone ni, “Ruoth, reswa! Wadhi nimo!”

²⁶Nodwokogi ni, Uluor kamano nang’o, yaye un joma niggi yie matin? Eka noa malo mokwero yembe gi apaka, mi nam noling’ thi. ²⁷Jogo nohum nono, kendo ne gipenjore ni, “Ma en ng’ama nade? Koda ka yembe gi apaka bende winje!”

Chang’o Mar Ji Ariyo Man-gi Jochiende

²⁸Kane ochopo loka komachielo e gweng’ mar Gadarena, chwo ariyo mane niggi jochiende nowuokne e gunda mar liete moromo kode. Ne giger asasa ma onge ng’ama nenyalo kalo kanyo. ²⁹Ne gikok matek ni, “Idwaro ang’o irwa ka,

Wuod Nyasaye? Mit kise biro ka mondo isandwa ka ndalo moketi pok ochopo?"

³⁰To mochwalore matin koa kama negintie, kweth maduong' mar anguro ne chieme. ³¹Jochiendego nosayo Yesu ni, "Kigolowa kuom ji ariyogi to orwa wadonji ei kweth mag anguroka."

³²Nowachonegi ni, "Dhiuru!" Omiyo ne gia kuom ji ariyogo mi gidhi nyaka ei anguro, kendo kweth duto kar rombgi noridore piny matek koluwo geng nam kama ridore nyaka ei nam mi negitho ei pi. ³³Joma nerito angurogo noringo oa mi negidhi e taon mi ginyiso ji gima notimoreno, kaachiel gi gima noyudo osetimore ne joma ne nigi jochiende. ³⁴Eka ji duto ma nodak e taondno nowuok oko mondo girom gi Yesu. To kane ginene, negiywagorene mondo oa e gweng'gi.

Yesu Ochango Ng'ama Nigi Athany

9 Yesu noidho yie mi ong'ado nam nyaka loka komachielo, mi nochopo e taon madalagi. ²Jomoko nokelone ng'ama nigi athany, konindo e pien. Ka Yesu noneno yie mane gin-go, nowacho ne ng'amane nigi athanyo ni, "Wuoda, bed gi kuwe e chunyi, richoni oweni."

³To mano nomiyo moko kuom jopuonj chik owacho kendgi giwegi ni, "Ng'atni eri yanyo Nyasaye!"

⁴Kaka Yesu nong'eyo pachgi, nowacho ni, "Ang'o momiyo uyie mondo paro maricho obed e chunyu?" ⁵Ere mayot molyo: Wacho ni, 'Richoni oweni,' koso wacho ni, 'Aa malo mondo iwuothi?' ⁶To mondo ung'e ni Wuod Dhano nigi teko e piny mar weyo richo..." Eka nowachone ng'ama ne nigi athanyo ni, "Aa malo kaw pieni mondo idhi dala." ⁷Mi ng'atno noa malo kendo odhi dala. ⁸Ka oganda noneno gima notimore, ne gipong' gi luoro; kendo ne gipako Nyasaye, ma nosechiwo teko machal kamano ne ji.

Luong Mar Mathayo

⁹Kane oyudo Yesu dhi nyime koa kanyo noneno ng'ato manyinge Mathayo

kobet e kiru mar jasol osuru. Nowachone ni, "Luwa," mi Mathayo noa malo kendo oluwe.

¹⁰E seche mane Yesu nie mesa e od Mathayo, josol osuru mang'eny gi "joricho" nobiro mochiemo kode kaachiel gi jopuonjrene bende. ¹¹Ka jo-Farisai noneno mano, negi penjo jopuonjrene ni, "Ang'o momiyo japuonju chiemo gi josol osuru kod joricho?"

¹²Kane Yesu owinjo mano, nowachonegi ni, "Joma ngima ok ema dwar daktar, to joma tuo ema dwaro. ¹³To dhiuru upuonjru tiend wachni: 'Gima adwaro en ni ukech joweteu, to ok ni uchiwna misango.' Nimar joricho ema asebiro mondo aluongi, to ok joma kare."

Openj Yesu wach kuom Tweyo Chiemo

¹⁴Eka jopuonjre Johana nobiro ire mopenje ni, "Ang'o momiyo wan kod jo Farisai watweyo chiemo to jopuonjreni to ok twe chiemo?"

¹⁵Yesu nodwokogi ni, "Ere kaka wend wuon kisera nyalo kuyo kapod en kodgi? Kata kamano ndalo nobi ma wuon kisera nogol kuomgi; eka ginitwe chiemo e kindeno.

¹⁶"Onge ng'ama bawo karaka manyien e law moti, nimar karakano biro mich mi ywa nangano, kendo mano biro miyo okidhore molyo. ¹⁷Machalre gi mano bende, ji ok thor olo divai manyien ei piende moti mag ting'o divai. Ka gitimo kamano to piendego biro barore, divai biro pukore oko, kendo piende mag ting'o divai biro kethore. Ooyo, giolo divai manyien e piende mag ting'o divai manyien, eka iritogi maber giduto kargi ariyo."

Nyako Motho Gi Dhako Matuo

¹⁸Kane oyudo owacho wechegi, jatelo moro nobiro mokulore nyime kawacho ni, "Nyara oatho machiegni. To yie ibi iket lweti kuome mondo obed mangima."

¹⁹Yesu noa malo kendo nodhi kode,

kaachiel gi jopuonjrene bende.

²⁰To apoya nono, dhako moro mane iye osebedo ka chwer kuom higni apar gariyo nopore gi yo katoke kendo nomulo lawe. ²¹Notimo kamano nimar nowacho gie chunye ni, "Ka anyalo mulo mana riak lawe kende to abiro chango."

²²Kane Yesu olokore monene, nowachone ni, "Bed motegno nyara, nikech yieni osechangi". Kendo dhakono nochango chakre sano. ²³Ka Yesu nodonjo e od jatelono, moneno jogo asili kod oganda mane goyo koko, ²⁴nowacho ni, "Ayiuru kae; nimar nyakoni nindo ema otero, ok otho." To gin ne ginyiere anyiera. ²⁵Kane oseriemb ogandano oko, nodonjo mi okawo nyakono gi bade, kendo noa malo. ²⁶Wach gima notimoreno nolandore e gweng'no duto.

Yesu Ochango Muofu Gi Momo

²⁷Kane uyudo Yesu medo dhi nyime koa kanyo, muofni ariyo ne luwo bang'e, ka kwarore kendo wacho ni, "Yie ikehwa wuod Daudi!"

²⁸Kane osedonjo ei ot, muofni ariyogo nobiro nyaka ire, kendo nopenjogi ni, "Be uyie ni anyalo timo ma?"

Ne giyiene ni, "Ee, wayie Ruoth."

²⁹Eka nomulo wengegi kowacho ni, "Biro timorenu kuom yie ma un-go;" ³⁰kendo ne gichako neno kendo. Yesu nosiemogi matek ni, "Neuru ni ng'ato ok ong'eyo wachni." ³¹To gin ne gidhi mi gikewo wach kuome e gweng'no duto.

³²Ka noyudo giwuok gia, nokelne Yesu ng'at moro mane nigi jochiende kendo mane ok nyal wuoyo. ³³To kane oseriemb jachiendno kuome, ng'at mane momono nowuoyo. Oganda nohum mowacho ni, "Gima chalo kama pok ne one e Israel nyaka nene." To jo Farisai to nowacho ni, "Teko mar ruodh jochiende ema ogologo jochiende."

³⁴To jo Farisai to nowacho ni, "Oriembo jochiende gi teko mar ruodh jochiende."

Jotich Nok

³⁵Yesu nodhi kuonde duto e taonde gi mier duto, kopuonjo e sunagokegi, koyalo Wach Maber mar pinyruoth, kendo kochango kit midekre gi tuoche duto. ³⁶Kane oneno oganda maduong' mane olwore, nokechogi, nikech ne ichandogi kendo gionge gi kony, mana ka rombe maonge gi jakwath. ³⁷Eka nowachone jopuonjrene ni, "Cham monego oka ng'eny to jotich nok. ³⁸Kuom mano, kwauru Ruodh keyo mondo oor jotich e puothe monego oka."

Yesu Ooro Jopuonjre Apar Gariyo

10 Noluongo jopuonjrene apar gariyo ire, mi omiyogi teko mondo giriemb chunje maricho kuom ji, kendo gichang kit midekre gi tuoche duto. ²Magi e nying jopuonjre apar gariyogo: Mkwongo ne en Simon (miluungo ni Petro), gi owadgi ma Andrea; kod Jakobo wuod Zebedi gi owadgi ma Johana; ³Filipo gi Bathlomeo; Thoma gi Mathayo ma jasol osuru; Jakobo wuod Alfayo, gi Thadayo; ⁴Simon ma ne en achiel kuom oganda jo-Zilote gi Juda ja-Iskariot mane ondhoge.

⁵Ji apar gariyogi Yesu nooro gi ote machal kama: "Kik udhi e dier ogendini maok jo-Yahudi, kendo kik udonj e taon moro amora mar jo Samaria. ⁶To dhiuru ir rombe molal mag jo-Israel kende. ⁷Ka un e wuoth udhi to yaluru wach kama: 'Pinyruodh polo ni machiegni.' ⁸Changuru joma tuo, chieruru joma otho, pwodhuru joma nigi dhoho, riemburu jochiende. Kaka useyudo nono, un bende chiwuru nono. ⁹Kik uting' kit pesa moro amora, kaka dhahabu kata fedha kata mula, e okandau mutweyo; ¹⁰bende kik uting' mifuko mar wuoth, kata kode ariyo, kata pat-pat, kata ludh wuoth; nikech jatich owinjore yud chiembe kuom ng'ama otiyone.

¹¹Taon kata gweng' moro amora mudonje to manyuru ng'ato mowinjore

modak kanyo, kendo daguru e ode nyaka chop chieng' ma ua. ¹²Ka udonjo e dala to moseuru. ¹³Ka dala mudonjeno en dala mowinjore, to kuwe maru nodong'ne, to ka ok owinjore, to kuwe maru noduognu. ¹⁴Ka onge ng'ama oyie rwakou kata winjo wecheu, to teng'uru buru momoko e tien-deu sama uwuok e dalano kata e taondno. ¹⁵Awachonu adier ni nobed maberber ne Sodom gi Gomora chieng' bura moloyo taondno. ¹⁶Aorou udhi oko mana kaka rombe madhi e dier ondiegi. Kuom mano, beduru mariek ka thuonde, kendo ma onge wach ka akuche.

¹⁷To beduru motang' ne ji, nimar gibiro ketou e lwet buche gweng', kendo gibiro rodhou e sunagokegi. ¹⁸Nikech nyinga, ibiro terou e nyim jotelo gi ruodhi kaka joneno mag-gi, kendo e nyim ogendini ma ok jo Yahudi. ¹⁹To ka gimakou to kik uparru kuom gima duwachi, kata kaka di uwuo kodgi. Nomiu gima uwacho e sehego, ²⁰nimar un uwegi ok ema unuwuo, to Roho mar Wuonu ema nowuo kokalo kuomu.

²¹Owadgi ng'ato owuon nondhog owadgi mondo onegi, kendo wuoro nondhog nyathine; nyithindo nong'any ne jonywolgi kendo nomi neg-gi. ²²Ji duto nochau nikech an, to ng'ama ochung' motegno nyaka giko noresi. ²³Ka isandou kamoro, to daruru kanyo udhi kama chielo. Awachonu adier ni ok unutiek dhi e taonde duto mag Israel kapok Wuod Dhano obiro.

²⁴Japuonjre ok oloyo japuonjne, kata jatich bende ok oloyo ng'ama ruodhe motiyone. ²⁵Ber moromo mondo japuonjre obed machal gi japuonjne, kendo ka jatich obedo machal gi ruodhe. Ka oseluong jatend ot ni Belzebug, koro jokanyo mag ode to ibiro luong kamano marom nade!

²⁶Omiyo kik uluorgi. Onge gima opandi maok nong'ere achien, kata mopondo ma ok nomi ji ng'e. ²⁷Gima anyisou kama opondo, wuouuru kuome e ler;

kendo gima okuodhnu e tie itu, huluru matek gie wi tat udi. ²⁸Kik uluor joma nego ringruok to ok nyal nego chuny. To ng'ama onego uluor en Jal manyalo tieko chuny kaachiel gi ringruok e gehena. ²⁹Oyundi ariyo donge ing'iew otonglo achiel? To kata kamano kata achiel kuomgi ok nyal lwar piny e lowo ka ok Wuonu ema oyie. ³⁰Bende, koda ka yier duto manie wiu osekwon mong'e kar rombgi. ³¹Omiyo kik uluor, nikech uloyo oyundi di mang'eny.

³²Ng'ato ang'ata mohulo ni ong'eya e nyim ji, an bende abiro hulo ni ang'eye e nyim Wuora manie polo. ³³To ng'ato ang'ata mokweda e nyim ji an bende abiro kwede e nyim Wuora manie polo.

³⁴Kik upar ni asebiro mondo akel kuwe e piny. Ne ok abiro mondo akel kuwe, to nabiro mondo akel ligangla.

³⁵Nikech asebiro mondo aketh kind

"ng'ato gi wuon mare, nyako gi min mare, chi wuowi gi min chwore,

³⁶wasik ng'ato nobed jokanyo mag joode owuon."

³⁷Ng'ato ang'ata mohero wuon kata min moloya ok owinjore koda. Kamano bende, ng'ato ang'ata mohero wuode kata nyare moloya ok owinjore koda; ³⁸kendo ng'ato ang'ata ma ok kaw msalape kendo oluwa ok owinjore koda. ³⁹Ng'at momako ngimane matek, biro wito ngimane; to ng'at mowito ngimane, nikech an, biro yude.

⁴⁰Ng'at morwakou orwaka, kendo ng'ama orwaka, orwako Ng'ama noora. ⁴¹Ng'ato ang'ata morwako janabi, nikech en janabi, noyud pok ma janabi yudo, kendo ng'ato ang'ata morwako ng'ama kare, nikech en ng'ama kare, noyud pok ma ng'ama kare yudo. ⁴²Bende ka ng'ato omiyo achiel kuom joma tindogi kata mana pi mang'ich gi okombe, nikech en japuonjrena, to awachonu adier ni pokne ok nobaye ngang'."

Yesu Gi Johana Jabatiso

11 Bang' ka Yesu nosetieko tiego jop-
uonjrene apar gariyo, nomedo dhi
nyime koa kanyo mondo opuonj kendo
oyal e taonde mag Galili.

²Ka Johana nowinjo e jela gik ma
Kristo ne timo, nooro jopuonjrene
³mondo openje ni, "in e ng'at mane onego
obi, koso wagen ng'at machielo?"

⁴Yesu nodwokogi ni, "Doguru kendo
udwok wach ne Johana gik musewinjo
kendo useneno: ⁵Muofni neno, rang'onde
wuocho, joma nigi dhoho ichango, joma
itgi odino winjo wach, joma otho ichiero,
kendo Wach Maber iyalo ne joma odhier.
⁶To ogwedh ng'at maok ochwanyore
nikeh an."

⁷Ka noyudo jopuonjre Johana wuok
dok, Yesu nochako loso gi oganda kuom
Johana kama: "Ang'o mane udhi mondo
une e kima? Ne udhi neno odundu ma
yamo tero koso? ⁸Ka ok en mano to en
ang'o mane udhi neno? Nudhi neno ng'a-
ma orwakore gi lewni mabeyo koso?
Ooyo, joma rwakore gi lewni mabeyo
iyudo mana e ute ruodhi. ⁹To kara en
ang'o mane uwuokne mondo une? Janabi?
Ee, anyisou ni ne udhi neno ng'at molo-
yo janabi gi duong'. ¹⁰Ma eni e ng'atono
mane ondiki kuome ni:

"Abiro oro jaotena mondo otel
nyimi, jaote manoik yori kapok
ibiro."

¹¹Anyisou ni e dier joma mon onywo-
lo duto, onge ng'ama osewuok e dier ji
maduong' molojo Johana Ja Batiso; mak
mana ng'ama tin mogik e pinyruodh polo
ema oloye gi duong'. ¹²Chakre ndalo mag
Johana Ja Batiso nyaka sani, pinyruodh
polo osebedo ka donjo gi thuo, kendo
joma thuondi ema kawe. ¹³Nimar ndiko
mag jonabi gi mag chik nokoro nyaka
ndalo Johana. ¹⁴Kendo kaponi uhero mar
rwako wachni to ng'euro ni en Elija mane
onego obi. ¹⁵Ng'at man gi itene mondo
owinji.

¹⁶En ang'o ma anyalo pimogo

tieng'ni? Gichalo nyithindo mobet e
chirni kendo maluongo jowetegi ni:

¹⁷"ne wagoyonu asili, to ne ok
umiel; Ne wadengo ka wawero
wend tho, to ne ok uywak."

¹⁸Nikech Johana Ja-Batiso nobiro ka
ok chiem kata methi, to giwacho ni,
'Jachien ni kode.' ¹⁹Wuod Dhano ma
nobiwo ka chiemo kendo metho, to negi-
wacho kuome ni, 'Neyeurowawuoro kendo
jamer mosiep josol osuru gi "jorichoni."
To rieko ng'ere ratiro kuom timbene."

Malit Ma Taonde Modagi Lokore Biro Neno

²⁰Eka Yesu nochako kwedo taonde
mane thoth honnige osetimoree, nikech
ne gitamore lokore. ²¹"Mano kaka ibiro
neno malit, in Korazin! Mano kaka ibiro
neno malit, in Bethsaida! Ka dine bed ni
honni mane otim e iyi notim Turo gi
Sidon to dine giselokore chon ka girwako
lep ywak kendo ka gibukore gi buru. ²²To
akonu ni chieng' bura weche nobed maber
ber ne Turo gi Sidon molojo ne un. ²³To
in Kapernaum, iparo ni ibiro ting'i malo
nyaka boche polo adier? Ooyo, ibiro boli
piny nyaka Gehena. Ka dine bed ni honni
mane otim e iyi ne otim ei Sodom to diko-
ro pod entie nyaka kawuono. ²⁴To akonu
ni chieng' bura weche nobed maber ber ne
Sodom molojo ne in."

Yweyo Ne Joma Ojony

²⁵E sechego Yesu nowacho ni, "Apaki
Wuora, Ruodh polo gi piny, nikech isepa-
ndo gigi ne joma riek gi joma osomo, to
isefwenyogi ne nyithindo matindo. ²⁶En
kamanu Wuora, nimar mano emane berni
kotimoro.

²⁷"Wuora oseketi moko duto e
lweta. To onge ng'ama ong'eyo Wuowi
makmana Wuoro kende, kendo onge
ng'ama ong'eyo Wuoro makmana Wuowi
kende, kod joma Wuowi oyiero mondo
ofwenyegigo.

²⁸"Biuru ira, un duto mujony kendo uting' o misigo mapek, mondo amiu yweyo. ²⁹Kawuru lodina mondo uting' kendo puonjreuru kuoma, nimar chunya muol kendo ahora mos, eka unuyud yweyo ne chunu. ³⁰Nimar lodina ok pek kendo misika yot."

Ruodh Sabato

12 E kindeno Yesu nokadho e dier puothe mag cham chieng' Sabato: To jopuonjrene nodenyo, omiyo ne gichako jako wiye cham moko kendo gichamo. ²Ka jo Farisai noneno mano, ne giwachone ni, "Ney! Jopuonjreni timo gima chik odagi chieng' Sabato."

³To en nodwokogi ni, "Donge useso- mo gima Daudi notimo, ka en kaachiel gi joma ne nikode ne gidenyo? ⁴Donge nodonjo e od Nyasaye, kendo en kaachiel gi joma ne ni kode, ne gichamo makati moketi tenge- ma en gima chik ne ok oyienegi mondo gitim, makmana jodolo kende ⁵Koso pok usomo e Chik ni chieng' Sabato, jodolo manie Hekalu chido odiechieng'no, to ok kwan-gi kaka joketho? ⁶To akonu ni nitie ng'ato ka maduong' molyo Hekalu. ⁷Ka dine bed ni useng'eyo tiend wach mawachoni, "Gima adwaro en ni ukech joweteu to ok ni uchi- wna misango," to dine ok ung'ado bura ne joma onge ketho. ⁸Nikech Wuod Dhano e Ruodh Sabato."

⁹Kane omedo dhi nyime koa kanyo, nodhi nyaka ei sunagokgi, ¹⁰to kanyo ne nitie ng'ato ma lwete otal. Ne gipenjo Yesu, ka gimanyo yo ma digiyudgo ketho kuome, ni, "Be chik oyie mondo ochang' ng'ato chieng' Sabato?"

¹¹Nowacho negi ni, "Ka ng'ato kuomu niggi rombo kendo rombono olwar ei bur chieng' Sabato, donge umake mi uywaye oko? ¹²To dhano donge lich molyo rombo di mang'eny! Kuom mano, chik oyie mondo otim maber chieng' Sabato."

¹³Eka nowacho ne ng'atno ni, "Rie lweti," mi norieye, kendo lwete nodoko kare chuth, mana kaka komachielo. ¹⁴To

jo Farisai nowuok odhi kendo ne gichano kaka digineg Yesu.

Jatich Nyasaye Moyier

¹⁵Kaka Yesu nong'eyo chenrogino, nodar kanyo. Ji mang'eny noluwe, kendo nochango ji duto mane tuo, ¹⁶kosiemogi ni kik ginyis ng'ato ni ne en ng'a. ¹⁷Mano notimore mondo gima nowachi gi dho Janabi Isaya, ni:

¹⁸"Eri jatichna ma aseiyero, Jal ma ahero ma chunya morgo; abiro keto Roho mara kuome, kendo obiro lando adiera ne ogendini. ¹⁹Ok obi dhawo kata kok; bende onge ng'ama biro winjo dwonde e wang' yore. ²⁰Odundu machiegni chot ok obituro, kendo kitambi maliel marach rach ok obi nego nyaka chop ota adiera mi lochi. ²¹E nyinge ema ogendini biro keto e genogi"

Yesu Gi Belzebub

²²Eka negi kelone ng'ama niggi jachien kendo ma muofu kendo momo; kendo Yesu nochange mi koro nonyalo wuoyo kendo neno. ²³Ji duto nohum kendo nowachoni, "Mit ki ma e Wuod Daudi?"

²⁴To ka jo Farisai nowinjo mano, ne giwacho ni, "Ng'ani riembo mana jochiende gi teko mar Belzebub, ruodh jochiende."

²⁵Yesu nong'eyo gima giparo mi nowacho negi ni, "Pinyruoth moro amora mopogore kende biro rumo, kendo taon moro amora kata ot mopogore kende ok nyal chung'. ²⁶Ka Satan riembo Satan to mano nyiso ni opogore kende owuon. Koro ere kaka pinyruodhe dichungi? ²⁷Ka diponi ariembo jochiende gi teko mar Belzebub, to jou to riembogi gi yo mane? Omiyo koro gibiro bedo joma ng'adonu bura. ²⁸To ka ariembo jochiende gi teko mar Roho Maler to kara pinyruoth chik Nyasaye osebironu.

²⁹Koso, ere kaka ng'ato nyalo donjo e od ng'ama ratego mi omaye gige odhigo, ka ok okuongo otweyo ng'ama rategono?"

Kosetimo kamano eka dohedhre mar yako gik moko e odno.

³⁰Ng'at maok ni koda kedo koda, kendo ng'ama ok konya choko ji keyo ji. ³¹Emomiyo akonu ni richo gi ayany moyanygo Nyasaye duto nowe ne ji, to ayany moyanygo Roho ok nowene ng'ato. ³²Ng'ato ang'ata mowacho wach moro marach kuom Wuod Dhano nowene, to ng'ato ang'ata mowuoyo marach kuom Roho Maler ok nowene, e tieng'ni kata e tieng' mabiro.

³³Los yien obed maber eka olembe biro bedo maber, kata ket yien obed marach kendo olembege biro bedo marach, nimar yien ing'eyo gi kit olemo monyago. ³⁴Un koth thuonde fu-gi, ere kaka unyalo wacho gimaber ka uricho kamano? Nimar gik manie chuny ng'ato iye ema miyo owuoyo gi dhoge kaka owuoya. ³⁵Ng'at maber golo oko gik mabeyo mawuok kuom ber mokano e iye, to ng'ama rach golo oko gik maricho mawuok kuom rach mokano e iye. ³⁶To akonu ni ochuno ni ji nyaka bi hul korgi chieng' bura kuom wach moro amora ma gisewacho ka ok giparo matut. ³⁷Nimar kuom wehegi iwuon miwacho ema iweyigo thuolo kendo kuom wehegi iwuon miwacho ema ibiro nga'adnigo bura."

Ranyisi Mar Jona

³⁸Eka jo Farisai moko gi jopuonj chik nowachone ni, "Japuonj wadwaro neno hono kuomi kaka ranyisi."

³⁹To nodwokogi ni, "Tieng' ma timbene richo kendo ma teroreni eri kwayo hono kaka ranyisi! To ok bi miye moro amora makmana ranyisi mar janabi Jona. ⁴⁰Nimar mana kaka Jona ne ni ei rech marang'ongo kuom odiechienge adek gi otieno adek, e kaka Wuod Dhano bende biro bedo ei chuny lowo kuom odiechienge adek gi otieno adek. ⁴¹Jo Niveve biro chung' e bura gi tieng'ni kendo biro kwane kaka jaketho; nimar gin ne gilokore kane giwinjo yalo mar Jona, to

sani koro nitie ng'ato ka maduong' molooyo Jona. ⁴²Ruoth madhako mar milambo bende biro chung' e bura gi tieng'ni kendo biro kwane kaka jaketho, nimar nobiro koa e tung' piny kuma bor mondo owinj rieko Solomon, to sani koro nitie ng'ato ka maduong' molooyo Solomon.

⁴³Ka jachien marach owuok kuom ng'ato, owuotho kuonde motuo koni gi koni, komanyo kama dojudie wweyo, to ok oyudi. ⁴⁴Eka owacho ni, 'Abiro dok e ot mane aaye.' Ka ochopo to oyudo ka odno iye ni nono, koyweye maler kendo oike maber. ⁴⁵Eka odok okelo chunje abiriyo mamoko maricho molooyo, kendo gidhi gidonjo kanyo mi gidagie. Bang'e achien ng'atno bedo marach molooyo kaka nochal mokwongo. Kamano e kaka biro timore ne tieng' marachni."

Min Yesu Gi Owetene

⁴⁶Ka Yesu nepod wuoyo ne oganda, min-gi gi owetene nochung' oko ka gidwaro loso kode. ⁴⁷Ng'at moro nonyiso Yesu ni, "Mamau gi oweteni ochung' oko dwa wuoyo kodi."

⁴⁸Nodwoko ng'atno ni, "Mamawa to en ng'a, koso owetena to gin ng'a gini?" ⁴⁹Eka nosiemo jopuonjrene kowacho ni, "Magi e mamawa gi owetena. ⁵⁰Nimar ng'ato ang'ata matimo dwaro mar Wuora manie polo en owadwa gi nyaminwa kod minwa.

Ngech Jakomo

13 Odiechieng' nogono Yesu nowuok e ot mi nobet e dho nam. ²Nikech oganda maratipo nochokore molwore, nodonjo e yie mobet e yie, ka ji duto to nochung' e dho nam oko. ³Eka nonyisogi gik mang'eny e yor ngeche, kowacho ni, "Japur moro nodhi komo kothe. ⁴Kane oyudo okiro kodhi, moko nolwar e dir yo, kendo winy nobiro mochamogi. ⁵Moko nolwar kuonde motimo lwendni- kuonde mane lowo onge moromo- mine giti piyo piyo nikech lowo ne thanythany. ⁶To ka chieng' nobiro, chamgo norewore kendo

ne giner, nikech ne gionge tiendegi. ⁷Kodhi ma moko nolwar e dier kuthe, kendo kuthego nodongo mo thung'ochung' kar ng'ama winjo wach kendo rwake sanosano gi mor. ²¹To nikech oonge gi tiendene, obet kuom kinde machwok kende. Ka chandruok gi sand obiro nikech Wach, to opodho piyo maok odeko. ²²Kodhi mane olwar e kind kudho to ochung' kar ng'at ma winjo wach, to parruok kuom ngima mar pinyni kod galruok ma mwandu kelo thung'ochung' wachno kendo mone nyak. ²³To kodhi mane olwar e lowo maber ochung' kar ng'at ma winjo wach kendo make, mi ochieg cham mang'eny mohingo kodhi mane okomgo nyadi mia, nyadi piero auchiel kata nyadi piero adek. ⁹Ng'at man gi ite to mondo owinji."

¹⁰Jopuonjre nobiro ire mopenje ni, "Ang'ochung' momiyo iwuoyo gi ji gi ngeche?"

¹¹Nodwokogi ni, "Un osemiurieko mar ng'eyo maling'ling' mag pinyruodh polo, to gin ok osemiurieki. ¹²Ng'at ma nigo ibiro medi mang'eny molooyo mi obed gi gik mogundho. To ng'ama ongego to ibiro kaw kuome koda ka matin ma en-go. ¹³Gimomiyo awuoyo kamano kodgi gi ngeche en mondo:

"Kik ginee kata obedo ni gineno; kik giwinji kata ging'e tiend wach kata obedo ni giwinjo.

¹⁴Kuomgi ema wach mokor mar Isaya chopo kare:

"ubiro siko kuwinjo awinja to ok unung'e tiend gik muwinjo; Ubiro siko kuneno to ok unuyang gik muneno.

¹⁵Nikech chuny jogi osedinore; winjo gi itgi otamogi chuth kendo gisedino wengegi. Ka dine ok en kamano to dine gineno gi wengegi, dine giwinjo gi itgi; kendo dine ging'eyo tiend wach gi chunyi mi gilokore; mi dine achangogi'.

¹⁶Un to wengeu ogwedhi nikech gineno, gi itu bende nikech giwinjo wach. ¹⁷Nimar anyisou adier ni jonabi gi joma kare mang'eny nogombo neno gima koro uneno, to ne ok ginene, kendo winjo gima koro uwinjo, to ne ok giwinje. p ¹⁸Koro winjuru tiend ngero mar jakomo: ¹⁹Ka ng'ato owinjo wach kuom pinyruoth to ok owinjo tiende, ng'ama rach biro kendo yudho gima okom e chunye mi dhigo.

Mano e kodhi mane okom e dir yo. ²⁰To kodhi mane okom kuonde motimo lwanda ochung' kar ng'ama winjo wach kendo rwake sanosano gi mor. ²¹To nikech oonge gi tiendene, obet kuom kinde machwok kende. Ka chandruok gi sand obiro nikech Wach, to opodho piyo maok odeko. ²²Kodhi mane olwar e kind kudho to ochung' kar ng'at ma winjo wach, to parruok kuom ngima mar pinyni kod galruok ma mwandu kelo thung'ochung' wachno kendo mone nyak. ²³To kodhi mane olwar e lowo maber ochung' kar ng'at ma winjo wach kendo make, mi ochieg cham mang'eny mohingo kodhi mane okomgo nyadi mia, nyadi piero auchiel kata nyadi piero adek."

Ngech Buya

²⁴Yesu nogoyo negi ngero machielo kama: "Pinyruodh polo chalogi ng'ama nokomo kodhi maber e puothe. ²⁵To ka noyudo ji duto nindo, jasike nobiro mopidho buya e dier ngano, ka aye to oa odhi. ²⁶Ka ngano nodongo moiko wiyegi to buya bende nochako limbo.

²⁷"Jotich wuon puodho nobiro ire mowachone ni, 'Jaduung', donge ne ikomo kodhi mabeyo lilo e puothi? Ka kamano to buya to oa kure?"

²⁸Nodwoko ni, 'Jasigu ema notimo ma "Jotich nopenje ni, "Diher mondo wadhi wapudhgi oko?"

²⁹To nodwoko ni, "Ooyo, kik utim kamano nikech seche ma upudho buyago unyalo pudho ngano bende kaachiel kodgi. ³⁰Wegiuru giti kaachiel giduto nyaka chieng' keyo. Ka kindeno ochopo to ananyis jokeyo mondo okwong ochok buya kendo otwegi pidhe pidhe mondo owang'gi; eka bang'e gichok ngano kendo gikel gikan e decha."

Ngech Koth Karadali Gi Ngech Thowi

³¹Nogoyo negi ngero machielo kama: "Pinyruodh polo chalo gi koth karadali ma ng'ato nokawo mopidho e

puothe. ³²Kata obedo ni en e kodhi matinie mogik kuom kotheu duto, to ka odongo to odoko yiend puodho maduong' molooyo mamoko duto, kendo obedo yien marahiri ma winy mahuyo e kor polo biro kendo piyo e bedene."

³³Nochako ogoyo negi ngero machielo kama: "Pinyruodh polo chalo gi thowi mane dhako moro okawo kendo oriwo gi mogo mang'eny nyaka nokuodo mogono chuth."

³⁴Yesu nowacho gigi duto ne oganda gi ngeche; ne ok owacho negi gimoro amora ma ok okonyore gi ngero. ³⁵Mano nochopo gimane owach gidho janabi ni,

"Abiro yawo dhoga mondo awuo gi ngeche, abiro hulo gik mosebedo kopondo nyaka aa chakruok piny."

Onyis Tiend Ngech Buya

³⁶Eka noweyo oganda mi odonjo e ot. Jopuonjrene nobiro ire kawacho ni, "Nyiswae tiend ngech buya manie puodho."

³⁷Nodwoko ni, "Ng'ama nokomo kodhi mabeyo en Wuod Dhano. ³⁸Puodho en piny, to kodhi maber ochung' kar yawuot pinyruoth. Buya gin yawuot Ng'ama Rach, ³⁹to jasigu ma komogi en Jachien. Keyo en giko piny, to jokeyo gin malaike.

⁴⁰Mana kaka ipudho buya kendo iwang'o e mach, e kaka biro bedo chieng' giko piny. ⁴¹Wuod Dhano biro oro malaikege, kendo gibiro golo gimoro amora manie pinyruodhe makelo richo kod ji duto matimo gik maricho. ⁴²Eka joma kare norieny kaka wang'chieng' ei pinyruoth mar Wuon-gi. Ng'at man-gi ite to mondo owinji. Gibiro witogi e mach makakni, kama ywagruok gi muodo lak nobedie. ⁴³Eka joma kare norieny kaka wang' chieng' ei pinyruoth mar Wuon-gi. Ng'at man-gi ite to mondo owinji.

Ngech Mwandu Mopandi Kod Kidi Ma Nengone Tek

⁴⁴Pinyruodh polo chalo gi mwandu

mopandi e puodho. Ka ng'ato noyude mi ochako opande kendo, eka noa kanyo kopong'gi mor kendo nodhi mousu gige duto mane en-go moduogo ong'iewogo puodhono.

⁴⁵"Bende pinyruodh polo chalo gi ja ohala mamanyo kite ma nengogi tek mondo owar. ⁴⁶Kane oyudo achiel moro ma nengone tek ahinya to noa modhi kendo nouso gige mane en-go duto mong'iewego.

Ngech Gogo

⁴⁷"Bende pinyruodh polo chalo gi gogo mane ochiki e nam momako kit rech duto mopogore opogore. ⁴⁸Kane osepong' to joywecho noywaye nyaka e dho nam. Eka ne gibedo piny mi gichoko rech mabeyo duto giketo ei okepni, to maricho to giwito. ⁴⁹Kamano e kaka nobedi chieng' giko piny. Malaike nobi kendo nopog joma timbegi richo gi joma kare, ⁵⁰kendo nowitgi ei mach maliel mager, kama ywagruok gi muodo lak nobedie.

⁵¹Yesu nopenjogi ni, "Be usewinjo tiend gigi duto?" Ne giyiene ni, "Ee."

⁵²Nowacho negi ni, "Kuom mano japuonj chik moro ka moro mosetiegi kuom wach pinyruodh polo chalo gi wuon ot magolo kuom gik mokano e deche, mwandu machon gi manyien."

Janabi Maok Oluor

⁵³Ka Yesu nosetieko goyo ngechegi, nowuok kanyo odhi nyime. ⁵⁴Ka nochopo e taon madalagi, nochako puonjo ji e sunagokegi, kendo ne giwuoro, ka gipenjore ni, "Rieko gi teko mar timo honni ma ng'atni nigogi oyudo kure?" ⁵⁵"Ma donge e wuod fundi baocha? Min-gi donge nyinge Maria, koso owetene donge gin Jakobo gi Josef gi Simon kod Juda? ⁵⁶Donge nyiminene duto ni kodwa ka? Ka kamano to ng'ani ogolo gigi duto kure?" ⁵⁷Kendo ne gichwanyore nikech en.

To Yesu nowacho negi ni, "Janabi onge gi duong' mana e taon ma dalagi

kendo e ode owuon.”⁵⁸Omiyo ne ok otimo honni mang’eny kanyo nikech ne gionge gi yie.

Ong’ad Wi Johana Ja- Batiso

14 E kindeno Ruoth Herode nowinjo humb Yesu, ²mi nowachone joritne ni, “Ng’atno nyaka bed Johana ja-Batiso. Nyaka bedni osechier oa kuom joma otho! Mano emomiyo teko mar timo homni tiyo kuome.”

³Noyudo Herode osemako Johana mi otweye kendo orwake e jela nikech wach Herodia ma chi owadgi miluongo ni Filipino, ⁴nimar Johana nosebedo ka nyisega ni, “Chik ok oyieni mondo ibed kode.”⁵Herode ne dwaro nego Johana, to noluoro oganda nikech ne gikawe kaka janabi.

⁶To chieng’ nyasi mar nyuol Herode, nyar Herodia nomiel negi aduwa, kendo nomoro Herode asasa, ⁷mi nosingorene, e yor kuong’ruok ni, enomiye gimoro amora mokwaye. ⁸To en, kane min oseji-we motelo, nowacho ni, “Miya kaeni wi Johana ja-Batiso e sanni.”⁹Ruoth ne chunye ochandore, to nikech wach kuong’ruok mare, kendo nikech wende mane nie nyasineno, nogolo chik mondo dwach nyano otim, ¹⁰mi nong’ad wi Johana e jela. ¹¹Wiye nokel kanie san kendo nomi nyakono, mane oting’e otere ne min. ¹²Jopuonjre Johana nobiro mokawo ringre kendo ne giike. Eka ne gidhi ginyiso Yesu.

Yesu Opidho Ji Alufu Abich.

¹³Ka Yesu nowinjo gima nosetimore, nowuok kanyo gi yie, ka en kende, modhi kama opondo. To kane oganda owinjo wachno, ne gia e taonde machiegni mi giluwe ka giwuotho gi tiendegi. ¹⁴Kane Yesu ogowo loka monono oganda maduong’no, nokechogi kendo nochango jogi duto mane tuo. ¹⁵Ka koro pinye ne chiegni imore, jopuonjre nobiro ire mowachone ni, “Ka en thim, kendo saa koro olewo. Nyis oganda oa odogi mondo

gidhi e mier kendo ging’iew chiemo ne gin giwegi. ¹⁶To Yesu nodwokogi ni, “Onge tiende mondo gia. Migiuru gimoro gicham un uwegi.”

¹⁷To ne gidwoke ni, “Wan gima wan-go ka en mana makati abich gi rech ariyo kende.

¹⁸Nowacho ni, “Kelnagiuru ane ka.”
¹⁹Eka nochiko mondo ji obed pinye lum. Bang’ kane osekawo makati abich gi rech ariyogo, kendo bang’ kane oseng’iyo malo e polo, nogoyo erokamano kaeto opogo makatino matindo tindo. Eka nomiyogi jopuonjre kendo jopuonjre nomiyogi ji. ²⁰Ne gichiemo giduto mi giyieng’, kendo jopuonjre nokwanyo ng’injo mane ji ochamo oweyo moromo aditni apar gariyo. ²¹kar romb joma nochiamo duto ne gin chwo alufu abich, ka ok okwan mon gi nyithindo.

Yesu Owuotho Ewi Pi

²²Gi sanosano bang’ mano, Yesu nochiko jopuonjre mondo odonji e yie kendo otel nyime kadhi loka machielo, ka en to ne pod odong’ chien kogonyo oganda. ²³Kane osegoniyogi, noidho modhi e bath got malo, mobet kar kende mondo olem. Kane pinye chiegni imore, ne en kanyo kende, ²⁴to yie to koro nosechopo kama ochwalore koa e dho nam, kendo apaka ne tage koni gi koni, nikech yamo nowuoknegi ataro.

²⁵Kar saa apar otieno, ka pinye chiegni ru, Yesu nowuok odhi irgi, kowuotho ewi ²⁶Kane jopuonjre onene kowuotho ewi pi, ne gibuoak motamore nono. Luoro nomakogi matek, kendo ne giwuok ka giwacho ni, “En jachien!”

²⁷To Yesu nowachonegi mapiyo ni, “Jiwuru chunyu! En An. Weuru luor.”

²⁸Petro nodwoke mowacho ni, “Ruoth, ka en in adier to nyisa mondo abi iri ka awuotho ewi pi.”

²⁹Nowachone ni, “Bi.”

Eka Petro nowuok e yie kendo nochako wuotho ewi pi kochomo ir Yesu. ³⁰To ka nonono yamo to luoro nomake,

kendo kane koro ochako nimo, noywak matek ni, "Ruoth, resa!"

³¹Yesu norieyo bade sano sano momake. Nowachone ni, "Ne iriwo gi kiawa nang'o, yaye ng'ama niggi yie matini?"

³²To kane giseidho yie mi gidonjo e iye, yamo nokuwe mos. ³³Omiyo joma neni ei yie nolame, ka giwacho ni, "In Wuod Nyasaye adier."

³⁴Kane gisechopo loka komachielo, ne gitundo Genesaret. ³⁵To ka jo gweng'no noyango Yesu, ne gioro wach e gwenge molworo kanyo duto. Ji nokelone jogegi mane tuo duto ³⁶kendo ne gisaye mondo oyie joma ne tuogo omulie kata mana riak lawe kende, kendo ji duto mane omule nochango.

Gik Maler Kod Gik Mogak

15 Eka jo Farisai gi Jopuonj chik nobiro ir Yesu koa Jerusalem mi openje ni, ²"Ang'o momiyo jopuonjreni ketho kido gi timbe mag jodongo? Ok giluoek lwetgi kapok gichiemo!"

³Yesu nodwokogi ni, "Ang'o momiyo uketho chik Nyasaye nikech wach kitu gi timbeu" ⁴Nimar Nyasaye nowacho ni, 'Luor Wuoru gi meru' kendo ni, 'Ng'ato ang'ata mokuong'o wuon kata min nyaka negi.' ⁵To un uwacho ni ka ng'ato owacho ne wuon kata ne min ni, 'Kony moro amora ma dine uyudo koa kuoma en mich ma aketo tenge ne Nyasaye', ⁶to ng'ama kamano koro ogony kuom 'Luoro wuon gi min' gi michneno. Kamano umiyo wach Nyasaye bedo maonge teko nikech wach kitu gi timbeu. ⁷Un joma wuondoregi! Isaya ne nikare kane okoro wach kuomu kama:

⁸"Jogi paka gi dhogi, to chunyi gi ni mabor koda. ⁹Gilama kayiem; nikech gipuonjo chike dhano ka gima gin puonj Nyasaye." ¹⁰Yesu noluongo oganda ire kendo owacho negi ni, "Chikuru itu mondo uwinj tiend wach ¹¹Gima donjo e dho ng'ato ok mi odok 'mogak,' to mana

gima wuok koa e dhoge ema miyo odoko 'mogak.'"

¹²Eka jopuonjre nobiro ire mopenje ni, "Be ing'eyo ni jo Farisai ne ochwany-ore kane giwinjo wachni?"

¹³Nodwoko ni, "Gimoro amora ma Wuonwa manie polo ok opidho ibiro pudh oko gi tiendene. ¹⁴Wegiuru aweya; gin jotecho ma muofni. Ong'ere ni ka ng'ama muofu otelone muofu wadgi to nyaka gipodhi e bugo giduto kargi ji ariyogo."

¹⁵Petro nowacho ni, "Nyiswae tiend ngerono."

¹⁶To Yesu nopenjogi ni, "Kare un bende wach pod ok donjnu? ¹⁷Donge ung'eyo ni gimoro amora madonjo e dhok dhi nyaka e ich kaeto owuok oko del? ¹⁸To gik mawuok e dhok aa e chunyi, kendo gin ema gimioyo ng'ato doko "mogak." ¹⁹Nikech chunyi ema gik maricho kaka; paro maricho, nek, terruok, chode, kuo, hango wach, gi ketho nying ji wuokie. ²⁰Magi e gik ma miyo ng'ato bedo 'mogak', to chiamo gi lwedo maok olwoki ok mi odok "mogak."

Yie Mar Chi Kanaan

²¹Bang' aa kanyo, Yesu nodhi nyaka gweng' Turo gi Sidon. ²²Chi Kanaan moro mane odak machiegni gi kanyo nobiro ire kaywagore ni, "Ruoth, Wuod Daudi, kecha! Nyara niggi jachien marach kendo osandore malit."

²³To Yesu ne ok odwoke kata wach achiel. Omiyo jopuonjre nobiro ire mojiwe ni, "Riembe odhi, nikech osiko kogoyo koko bang'wa."

²⁴Nodwoko ni, "Ne oora mana ne rombe molal mag Israel kende."

²⁵To dhakono nobiro mogoyo chonge piny e nyime, kawacho ni, "Ruoth, yie ikonya."

²⁶To nodwoko ni, "Ok en gima ber kawo chiemb nyithindo mondo idir ne guogi."

²⁷Dhakono nodwoke ni, "Mano en adier Ruoth, to kata guogi bende chamo

ng'injo molwar piny koa e mesa ruodhgi.”
²⁸Eka Yesu nodwoko ni, “Dhako, in gi yie maduong’ ndi! Kwayoni osechopi.” Kendo nyare nochango kochakore sano.

Yesu Opidho Ji Alufu Ang’wen

²⁹Yesu noa kanyo kendo noluwo tie Nam Galili. Eka noidho malo mobet piny e bath got. ³⁰Oganda maduong’ nobiro ire, kendo ne gikelone rong’onde, muofni, pudhe, momni gi ji matuo mamoko mang’eny, mi ne giketogi e tiende; kendo nochangogi. ³¹Dho ji nomoko kane gineno ka momni wuoyo, pudhe ngima, rang’onde wuotho, kendo muofni neno, kendo ne gipako Nyasach Israel. ³²Yesu noluongo jopuonjrene ire mowacho ni, “Akecho jogi nikech koro gisebedo koda kuom ndalo adek to gionge gi gima digicham. Ok adwar mondo agonygi gidhi ka gidenyo, nono to kech nyalo goyogi piny e yo.”

³³Jopuonjrene nodwoke ni, “Ere kuma dwayudie makati e chuny pinyka manyalo pidho oganda makwar machal kama?”

³⁴Yesu nopenjogi ni, “Un-gi makati adi?”

Ne gidwoke ni, “Abiriyo kende gi rech matindo-tindo manok.”

³⁵Eka nochiko mondo ji obed piny e lowo. ³⁶Kendo nokawo makati abiriyo gi rechgo, kendo kane osegoyo erokamano, ne opogogi matindo-tindo kendo nochiwogi ne jopuonjre, ma bende nomiyogi ji. ³⁷Ne gichiemo giduto mi giyieng’. Bang’ chiemo jopuonjre nokwanyo ng’injo mane ji ochamo oweyo moromo aditni abiriyo. ³⁸Kar romb joma nochiemo duto ne gin alufu ang’wen, ka ok okwan mon gi nyithindo. ³⁹Bang’ ka Yesu noseponyo oganda odhi, nodonjo e yie mi odhi e gweng’ mar Magadan.

Kwayo Mar Ranyisi

16 JO -FARISAI gi Jo Sadukai nobiro ir Yesu mi oteme kapenje mondo onyisgie ranyisi moa e polo.

²Nodwokogi ni, “Kochopo odhiambo

to uwacho ni ‘piny kiny nolendi nikech polo marmar,’ ³to gokinyi to uwacho ni, kodh yamo maduong’ wang’nochwe nikech polo marmar kendo dudo.’ Ulony e somo kit polo, to somo ranyisi mag kit ndalo to otamou. ⁴Tieng’ ma timbene richo kendo materoreni manyo ranyisi mar hono, to ok bi miye moro amora mak mana ranyisi mar Jona.” Eka Yesu nowuok odhi oweyogi.

Thowi Mar Jo Farisai Gi Jo Sadukai

⁵Bang’ kane giseng’ado loka nam, jopuonjre wigi nowil maok oting’o makati. ⁶Yesu nowacho negi ni, “Beduru motang’ kendo ritreuru ne thop jo Farisai gi jo Sadukai.”

⁷Ne giloso kendgi kuom wachni, ka giwacho ni, “Owuoyo kamano nikech ne ok wating’o makati kata achiel.”

⁸To kaka nong’eyo gimane giwacho kendgi, Yesu nopenjogi ni, “Un joma nigiyie matin-gi, ang’o momiyo uloso kendu kuom wach makati ma uongego? ⁹Kare wach pok odonjonu? Donge uparo makati abich mane opidho ji alufu abich, kod kar romb aditni mane uchoko? ¹⁰Kata makati abiriyo mane opidho ji alufu ang’wen, kod kar romb aditni mane uchoko? ¹¹Ere kaka wach pok odonjonu ni ne ok awuo kodu kuom makati? To ritreuru kuom thop jo Farisai gi jo Sadukai. ¹²Eka negiwinjo tiend wach ni kare ne ok owachnegi ni giritre kuom thowi mitedogo makati, to ni mondo giritre kuom puonj jo Farisai gi jo Sadukai.

Petro Ohulo Ni Yesu En Ng’a

¹³Ka Yesu nodonjo e gweng’ mar Kaisari man Filipi, nopenjo jopuonjrene ni, ‘Ji wacho ni Wuod Dhano en ng’a?’

¹⁴Ne gidwoke ni, “Jomoko wacho ni en Johana ja Batiso, to jomoko ni en Elija, to jomoko bende ni en Jeremia, kata achiel kuom jonabi.”

¹⁵Nopenjogi ni, “To un to uwacho ni An ng’a?”

¹⁶Simon Petro nodwoke ni, “In e

Kristo, Wuod Nyasaye Mangima.”

¹⁷Yesu nodwoke ni, “Ogwedhi adier, Simon wuod Jona, nimar dhano ok ema osefwenyoni tiend wachni, to Wuora manie polo ema osefwenyonigo. ¹⁸Kendo anyisi ni in Petro, kendo e lwandani ema abiro gere kanisana, kendo dhorangeye mag Gehena ok noloye ngang’.” ¹⁹Abiro miyi kifungni mag pinyruodh polo; kendo gimoro amora mitweyo e pinyka notwe e polo, to gimoro amora migonyo e piny nogony e polo.” ²⁰Eka nosiemo jopuonjrene ni kik ginyis ng’ato ang’ata ni ne en Kristo.

Yesu Okoro Thone

²¹Chakre kindeno kadhi nyime Yesu nochako nyiso jopuonjrene ni ne ochuno ni nyaka odhi Jerusalem kendo osandre e yore mang’eny e lwet jodong oganda gi jodolo madongo kod jopuonj chik, kendo ni ne nyaka bi nege kendo ochier obed mangima chieng’ mar adek.

²²Petro nokawe okete tenge kendo nokwere. Nowachone ni, “Ruoth, we wuoyo kamano. Gima kamano ok nyal timoreni ngang’!”

²³Yesu nolokore mowacho ne Petro ni, “Dog chien kang’eya, Satandni! In kidi mar chwanyruok ne an; nikech iketo pachi kuom gig dhano to ok kuom gig Nyasaye.”

²⁴Eka Yesu nowachone jopuonjrene ni, “Ka ng’ato dwaro luwo bang’a to nyaka okwedre owuon kendo oting’ msalape kendo oluwa. ²⁵Nimar ng’ato ang’ata madwaro reso ngimane, ngimane biro lalne, to ng’ato ang’ata mowito ngimane nikech an biro yude. ²⁶Koso en ber mane ma dhano nyalo yudo ka piny duto obedo mare to ngimane to olalne? ²⁷Nimar Wuod Dhano noduogi e duong’ mar Wuon mare kaachiel gi malaikege, kendo chieng’no enomi ng’ato ka ng’ato pokne kaluwore gi gima osetimo. ²⁸Awachonu adier ni nitie jomoko mochung’ ka sani ma ok nobil tho kapok gineno Wuod Dhano kabiro gi pinyruodhe.”

Kit Yesu Olokore

17 Bang’ ndalo auchiel, Yesu nokawo kaachiel kode Petro, Jakobo, gi Johana owadgi Jakobo mi notelo negi nyaka e wi got malo kar kendgi. ²Kuno kite nolokore e nyimgi. Lenda wang’e norieny ka chieng’, kendo lepe nolokore rachar marieny ka ler. ³Apoya nono Musa gi Elija nothinyore e nyimgi kanyo, ka giwuoyo gi Yesu.

⁴Petro nowacho ne Yesu ni, “Ruoth, bedowa ka en gima ber. Ka iyiena to abiro gero abilni adek kae; achiel mari, achiel mar Musa kendo machielo mar Elija.”

⁵Ka noyudo pod owuoyo, boche marieny noimogi, kendo dwol noa e bocheno kawacho ni, “Ma en Wuoda mahero kendo amor kode, winjeur!”

⁶Kane jopuonjre owinjo wachno, luoro nomakogi mi gipodho piny ka gikulo wiyegi piny. ⁷Yesu nobiro irgi momulogi, kowacho ni, “Auru malo, kendo weuru bedo maluor.” ⁸Kane giting’o wengegi, ne ok gineno ng’ato mak mana Yesu kende.

⁹Kane oyudo gilor gia e wi got, Yesu nowuoyo negi kowacho ni, “Kik unyis ng’ato gima useneno, nyaka chop chieng’ ma Wuod Dhano nochier koa e tho.”

¹⁰Jopuonjre nopenje ni, “Kare ang’o momiyo jopuonj chik wacho ni Elija nyaka bi mokwongo?”

¹¹Yesu nodwoko ni, “Kuom adier, Elija nyaka bi mondo oket gik moko duto kare. ¹²To akonu ni Elija koro osebiro, to kata kamano ne ok giyange, to ne gitimone gimoro amora ma gihero. Wuod dhano bende ibiro sandi e lwetgi e yo machalre. ¹³Eka jopuonjre noyango ni nowuoyo kodgi kuom Johana ja Batiso.

Ochang Wuowi Mane Nigi Jachien

¹⁴Kane giduogo ir oganda, ng’at moro nobiro ir Yesu mogoyo chonge piny e nyime. ¹⁵Nowachone ni, “Ruoth, yie ikech wuoda, nikech en-gi ndulme kendo osandore malit. Ojapodhoga piny e mach kata e ipi. ¹⁶Ne akele ne jopuonjreni mondo gichange, to ne otamogi.”

¹⁷Yesu nodwokogi ka wacho ni, “Yaye tieng’ motamore yie kendo mokethoreni, abiro bedo kodu marom nadi? Abiro dak e dieru marom nadi? Kelnauru wuowino ka.” ¹⁸Yesu nokwero jachiendno, mi nowuok oa kuom wuowino, kendo nochango kochakore sano.

¹⁹Eka jopuonjre nobiro ir Yesu ling’ling’ mi openje ni, “Ang’o momiyo wan nende ok wanyal riembe?” ²⁰Nowachonegi ni, “Nikech un-gi yie matin nono. Anyisou adier ni ka un-gi yie matin marom gi koth karadali to unyalo wacho ne godni ni, “Wuogi ia ka idhi kacha, kendo dowuogi modhi. Onge gima dibednu matek.

²¹To jachien ma kama ok nyal riembi ka ok ng’ato olamo matek kendo otweyo chiemo.”

²²Kane gichokore kaachiel Galili, nowacho negi ni, “Wuod Dhano ibiro ndhogi mi keti e lwet ji. ²³Gibiro nege, to chieng’ mar adek ibiro chiere mobed mangima kendo. Kendo jopuonjre kuyo nomako maduong’.

Osuru Mar Hekalu

²⁴Bang’ ka Yesu gi jopuonjrene nochopo Kapernaum, jochok osuch dirachma ariyo-ariyo nobiro ir Petro mopenjo ni, “Donge Japuonju chulo osuch Hekalu?”

²⁵Nodwoke ni, “Ee, ochulo.”

Ka Petro nochopo e ot, Yesu ema nokwongo wuoyo kode kapenje ni, “Iparo nade kuom wachni, Simon? Ruodhi mag piny choko osuru mopogore opogore kuom nyithindgi koso kuom jomamoko?”

²⁶Petro nodwoko ni, “Kuum jomamoko.”

Yesu nowachone ni, “Ka kamano to kare nyithindo ni thuolo. ²⁷To mondo kik wachwanyi, dhi e nam mondo ichik olopi; kaw rech mimako mokwongo; yaw dhoge, kendo ibiro yudo pesa moromo shekel achiel. Kawe imiye jogo kaka osucha kod mari.”

Ng’at Maduong’ Mologyo E

Pinyruodh Polo

18 E kindeno jopuonjre nobiro ir Yesu mopenje ni, “En ng’a maduong’ mologyo e pinyruodh polo?” ²To noluongo nyathi moro matin mi okete ochung’ e diergi. ³Eka nowacho ni, “Anyisou adier ni ka ok ulokoru muchalo gi nyithindo matindo to ok ubi donjo e pinyruodh polo ngang’.” ⁴Emomiyo ng’ato ang’ata mobolore kaka nyathini chaloni e ng’at maduong’ mologyo e pinyruodh polo.

⁵Kendo ng’ato ang’ata morwako nyathi machal kama e nyinga to an ema orwaka. ⁶To ka ng’ato omiyo achiel kuom joma tindo moyie kuomagi otimo richo to dibed maber ka otwene nyapong’ maduong’ e ng’ute kaeto onyumego e chuny nam.

⁷Piny none malit nikech gik mamiyo ji donjo e richo! Ochuno ni gik makamagi nyaka bedie, to ng’at mamiyo gibiro biro wuoro! ⁸Ka lweti kata tiendi miyo itimo richo to ng’ade oko kendo iwite mabor. Ber mologyo ne in kidonjo e ngima king’ol kata ka in puth mologyo bedo gi lwedo ariyo kata tiende ariyo to owiti e mach mochwere. ⁹Kamano bende ka wang’i miyo itimo richo to lodhe oko kendo iwite mabor. Ber mologyo ne in kidonjo e ngima gi wang’ achiel mologyo bedo gi wenge ariyo to owiti e mach mar Gehena.

Ngech Rombo Molal

¹⁰Neuru ni ok uchayo achiel kuom joma tindogi. Nimar anyisou ni malaikegi manie polo osiko ka ng’iyo wang’ Wuora manie polo. ¹¹Nikech Wuod Dhano ose-biro mondo owar joma olal.

¹²Uparo nade? Ka ng’ato nigiri rombe mia achiel, to achiel kuomgi olal, donge ng’atno diwe piero ochiko gochikogo mi odhi omany achiel molalno? ¹³To awachonu adier ni koyude to obedo mamor kuom rombo achielno, mologyo kuom piero ochiko gochiko mane ok olal. ¹⁴Machalre gi mano, wuonu manie polo ok dwar ni kata achiel kuom joma tindogi olal.

Owadu Mokethoni

¹⁵"Ka owadu ochwanyani to dhi kendo inyise kethone, mana e kindu kode ji ariyo. Ka ochikoni ite mowinjo to mano iseloso kindi gi owaduno. ¹⁶To ka otamore winji to kaw ng'ato achiel kata ji ariyo idhi iwuogo kode, mondo, "winjruck marach duto mantie olosi ka joneno ariyo kata adek nitie." ¹⁷Kodagi winjogi, to nyis kanisa wachno; to kodagi winjo nyaka kanisa, to kawe kaka dikaw ng'at ma japiny kata jasol osuru.

¹⁸"Anyisou adier ni gimoro amora mutweyo e pinyka notwe e polo bende, kendo gimoro amora mugonyo e pinyka nogonyo e polo bende.

¹⁹"A nyisou bende ni ka ji ariyo kuomu e pinyka owinjore kuom gimoro amora mukwayo to Wuora manie polo notimnugo. ²⁰Nimar kama ji ariyo kata adek ochokoree e nyinga to an kodgi kanyo."

Ngech Jatich Maonge Kech

²¹Eka Petro nobiro ir Yesu mopenje ni, "Ruoth, owinjore awene owadwa ndalo adi kokethona? Nyaka ndalo abiriyo koso?"

²²Yesu nodwoke ni, "Akoni ni ok dibiriyo to di piero abiriyo nyadibiriyo."

²³"Mano emomiyo pinyruodh polo chalgi ruoth mane dware nono kaka jotichne osetiyo gi pesane. ²⁴Kane ochako timo nonrono, ng'at moro mane niggi gope moromo talanta alufu apar ne okel e nyime. ²⁵To kaka ne ok onyal chulo gopeno, ruodhe nogolo chik mondo en kaachiel gi chiege gi nyithinde, kod gik moko duto mane en-go ousi mondo ochul gwino.

²⁶"To jatijno nogoyo chonge piny e nyime, moywagorene ni, "Yie ihorina mos, abiro chuli gopino duto tee." ²⁷Ruodh jatijno nokeche mi owene gopeno lendo ogonye odhi.

²⁸"To bang' ka jatich nogono nosea odhi, noyudo achiel kuom jotich wetene mane niggi gope moromo dinari mia achiel.

Nomake matek mochako deye, kowacho ni, "Chula gopa ma in-go sani!"

²⁹"Jatich wadgino nogoyo chonge piny e nyime moywagorene ni, "Yie ihorina mos, abiro chuli gopi."

³⁰"To nodagi. Kar timo kamano to noa kanyo mi olosi wach mondo orwak ng'atno e jela nyaka chop ochul gwino. ³¹Ka jotich mamoko nonono gima notimreno, chunyi nodoko malit ahinya kendo ne gidhi mi ginyiso ruodhgi gik moko duto mane osetimoro.

³²"Eka ruodhno noluongo jaticheno ire, mowachone ni, 'An ne aweni gopa mane in-go duto nikech ne iywagorina mondo atim kamano. ³³Ang'o momiyo into ne itamori kecho jatich wadu kaka an bende ne akonyi?' ³⁴Ruodhe ne mirima omako kode mi nochuwe e lwet jojela mondo orodhe maonge kech, nyaka chop ochul gowi duto mane en-go.

³⁵"Kamano e kaka Wuora manie polo biro timone ng'at ka ng'ato ka ok oweyo ne nyawadgi gie chunye."

Ketho Keny

19 Kane Yesu osetieko wacho gigi, noa Galili kendo nodhi nyaka e gweng' mar Judea loka Aora Jordan komachielo. ²Oganda maduong' noluwe, kendo nochangogi kuno.

³Jo Farisai moko nobiro ire mondo oteme. Ne gipenje ni, "Be en gima kare mondo ng'ato oketh keny gi chiege nikech wach moro amora?"

⁴To nodwokogi ni, "Donge usesomo ni kar chakruok Jachwech 'nochweyogi dichwo gi dhako,' ⁵nomedo wacho ni, 'Nikech wachni dichwo nowe wuon gi min kendo nopadre gi chiege, mi ji ariyogo nobed ringruok achiel?' ⁶Omiyo koro ok gin ji ariyo, to gin achiel. Kuom mano, gima Nyasaye oseriwo kaachiel kik dhano moro amora poggi."

⁷Ne giwachone ni, "Ka en kamano to marang'o Musa nochiko ni dichwo mondo omi chiege satifiket mar ketho keny eka oriembe?" ⁸Yesu nowacho negi

ni, "Musa noyieneu mondo uketh keny gi mondu nikech chunjeu ne tek. To ok ne en kamano nyaka aa chakruok. ⁹Anyisou ni dichwo moro amora moketho keny gi chiege, mak mana ne wach chode, mi onyuomo dhako machielo, to timo richo mar terruok."

¹⁰Jopuonjre nowachone ni, "Ka kamano e kaka wach chalo e kind dichwo gi dhako to kara ber moloyo ka ng'ato ok okendo."

¹¹To Yesu nokonegi ni, "Ji duto ok nyal rwako wachno, to makmana joma osemi nyalo mar timo kamano. ¹²Nimar jomoko gin buoch nikech ne onywolgi kamano, joma moko ji ema oroyo eka odoko buoch, to mamoko to oseweyo kend nikech wach pinyruodh polo. Ng'at mohero rwako wachni to mondo orwake."

Nyithindo Matindo Kod Yesu

¹³Eka ji nokelone Yesu nyithindo matindo, mondo oket lwete kuomgi, kendo olem negi. To jopuonjre nokwero joma nokelogigo.

¹⁴To Yesu nowacho ni, "Weuru nyithindo matindo obi ira, kendo kik utamgi, nikech pinyruodh polo en mar joma chalo kamagi. ¹⁵Kane oseketo lwete kuomgi, nomedo dhi nyime koa kanyo.

Wuowi Ma Jamoko

¹⁶Eka ng'at moro nobiro ir Yesu mopenje ni, "Japuonj, en ang'o maber monego atim mondo eka ayud ngima mochwere?"

¹⁷To Yesu nokone ni, "Ang'o momiyo ipenja kuom gima ber? Nitie mana Ng'at achiel kende maber. Ka idwaro donjo e ngima to rit chike."

¹⁸Ng'atno nopenje ni, "Chike mage?"

Yesu nodwoko ni, "Kik ineki, kik ichodi, kik ikwal, kik tim nend miriambo, ¹⁹Luor wuoru gi meru, kendo iher nyawadu kaka iherori iwuon."

²⁰Wuowi matinno nowachone ni, "Mago duto aserito. En ang'o machielo mapod aremo?"

²¹Yesu nodwoke ni, "Kidwa doko mal-ong'o chuth to dhiyo ius gigi duto mondo imi joma odhier eka inibed gi mwandu e polo. To bang' timo kamano to bi iluwa."

²²Ka wuowi matin-no nowinjo mano, noa odhi ka chunye lit, nikech ne en-gi mwandu mathoth ahinya.

²³Eka Yesu nowachone jopuonjrene ni, "Anyisou adier ni en gima tek mondo jamoko odonji e pinyruodh polo. ²⁴Bende anyisou ni yot mondo ngamia okal e wang' sandan moloyo mondo jamoko odonji e pinyruodh polo."

²⁵Kane jopuonjre owinjo wachni, ne gidhier nono kendo ne gipenjore ni, "Ka en kamano to be inyalo war ng'ato adier?"

²⁶To Yesu nong'iyogi tir mi owacho negi ni, "Mano en gima ok nyalre ne dhano, to ne Nyasaye to gik moko duto nyalore."

²⁷Petro nodwoke ni, "Wan waseweyo gik moko duto mondo waluwi! Kara en ang'o mwabiro yudo?"

²⁸Yesu nowachonegi ni, "Anyisou adier ni chieng' ma nolokie gik moko duto manyien, ka Wuod Dhano nobed e kom lochne man-gi duong', un musebedo ka uluwa bende unubed e kombe mag loch apar gariyo, kuyalo dhout Israel apar gariyo. ²⁹Kendo ng'ato ka ng'ato moseweyo udi, kata owete kata nyimine, kata wuoro kata miyo, kata nyithindo, kata puothe nikech an, noyud gigo nyadi mia, kendo nocham ngima mochwere. ³⁰To ji mang'eny ma sani ni nyime nobed chien mogik, kendo joma sani ni chien mogik, nobed nyime.

Ngech Jotich Manie Puoth Mzabibu

20 Nimar pinyruodh polo chalo gi wuon puodho mane owuok gokinyi kogwen, mondo ondik ji mane biro tiyone e puothe mar mzabibu. ²Nowinjore kodgi ni nobiro chulogi dinari achiel ng'ato ka ng'ato kuom odiechieng'no, eka noorogi e puothe mar mzabibu.

³Kar saa adek nowuok oko mi

noneno joma moko kochung' e chiro ka gibusu abudha. ⁴Nokonegi ni, 'Un be dhiuru uti e puotha mar mzabibu, kendo abiro chulou gimoro amora mowinjore.' ⁵Omiyo ne gidhi.

"Nochako owuok oko kar saa auchiel kod saa ochiko kendo notimo kaka notimo mokwongo. ⁶Kar saa apar gachiel bende nowuok oko, kendo nochako oyudo mana ka jomoko pod ochung' achung'a kanyo. Nopenjogi ni, 'Ang'o momiyo usebedo ka uchung' achung'a ka odiechieng' duto maonge gima utim?'

⁷Ne gidwoke ni, " 'Nikech onge ng'a-ma osemiyo tich nyaka chakre okinyi.'

"Nowachonegi ni, 'Un be dhiuru uti e puotha mar mzabibu.'

⁸"Kane ochopo odhiambo, wuon puoth mzabibu nowacho ne nyapache ni, "Luong jotich mondo ichulgi misachgi, kichako gi joma ne ondiki achien mogik, eka idok ir joma nondiki mokwongo.'

⁹"Jotich mane ondiki kar saa apar gachiel odhiambo nobiro kendo moro ka moro kuomgi noyudo dinari achiel.

¹⁰Omiyo ka joma nondiki mokwongo nobiro, ne gigeno yudo mang'eny. To moro ka moro kuomgi be noyudo mana dinari achiel. ¹¹Kane giyude, ne gichako ng'ur gi wuon puodho, ¹²ka giwacho ni, 'Joma ne ondiki achien mogikgi osetiyo kuom saa achiel kende, to isemiyo gidoko marom kodwa, wan mwaseting'o pek tich ka watiyo odiechieng' duto gi chieng' makech.'

¹³To nodwoko achiel kuomgi ni, 'Osiepna, onge gima rach ma asetimoni. Donge ne iyie ni itiyo ne dinari achiel?'

¹⁴Kaw chudoni mondo idhi. An awuon ema ayiero mondo ami ng'at mane ondiki achien mogik chudo maromre gi mari.

¹⁵Donge an gi ratiro mar timo gima adwaro gi pesana? Koso nyiego omaki koda nitech ang'won?'

¹⁶"Kuumano joma ni chien mogik nobed mokwongo, to joma okwongo nobed chien mogik."

Yesu Ochako Okoro Thone Kendo

¹⁷Kane oyudo Yesu idho dhi Jerusalem, nokawo jopuonjre apar gariyo oketo tenge kendo nowachonegi ni, ¹⁸"Eri waidho wadhi Jerusalem, kendo Wuod Dhano ibiro ndhugi mi chiw e lwet jodolo madongo gi jopuonj chik. Gibiro ng'adone buch tho, ¹⁹kendo gibiro chiwe ne ogendini maok jo Yahudi mondo ojare, orodhe kendo ogure. To chieng' mar adek nochier mobed mangima kendo!"

Kwayo Mar Miyo

²⁰Eka min yawuot Zebedi nobiro ir Yesu kaachiel gi yawuote, kendo bang' goyo chonggi piny e nyime, ne gikwaye ni otimnegie ng'wono.

²¹Yesu nopenjogi ni, "En ang'o midwaro?"

Nowachone ni, "Gol chik mondo moro ka moro kuom yawuota ariyogi obi obed kodi e lochni, moro e badi korach-wich to machielo e badi koracham."

²²To Yesu nowachonegi ni, "Ok ung'eyo gima ukwayo. Be unyalo madho okombe ma adhi madhoni?"

Ne gidwoke ni, "Wanyalo."

²³Yesu nowachonegi ni, "Kikombena to en adier ni ubiro methoe, to bedo e bada kora kata koracham an ok achiw. Kuondego gin mag joma Wuora noiko negi chon."

²⁴Ka jopuonjre apar mamoko nowinjo wachno, ne gikecho gi owete ariyogo.

²⁵To Yesu noluongogi kaachiel mowachonegi ni, "Ung'eyo ni joloch mag jopiny rito jogegi gi ang'enge, kendo jotendgi madongo tiyogi gi thuon, ²⁶un to ok un kamano. Kar timo kamano to ng'ato ang'ata madwaro bedo maduong' e dieru nyaka bedi jatichu, ²⁷kendo ng'ato ang'ata madwaro bedo ng'at mokwongo nyaka bed misumbau, ²⁸mana kaka Wuod Dhano ne ok obiro mondo ji otine, to mondo otine ji, kendo mondo ochiw ngimane obed gima iwarogo ji mang'eny."

Muofni Ariyo Oneno

²⁹Ka noyudo Yesu gi jopuonjrene koro wuok Jeriko, oganda maduong' noluwe.

³⁰To muofni ariyo mane oyudo obet e bath yo kane owinjo ni Yesu ne kadho machiegni kanyo, nokok matek ni, "Ruoth, Wuod Daudi, yie ikechwa!"

³¹Oganda nokwerogi monyisogi ni giling', to gin koro eka ne gimedo kok matek moloyo ni "Ruoth, Wuod Daudi, yie ikechwa!"

³²Omiyo Yesu nochung' kendo noluongogi ire, mopenjogi ni, "Udwaro ni atimnu ango?"

³³Ne gidwoke ni, "Ruoth, wadwaro ni wanen."

³⁴Yesu nokehogi, mino mulo wengegi. Gikanyono wengegi noyawore, kendo ne giluwe.

Yesu Odonjo Jerusalem Gi Rwak Maduong'

21 Ka koro ne gichiegni chopo Jerusalem, bang' tundo Bethfage manie Got Zeituni, Yesu nooro jopuonjrene ariyo, ²kowacho ni, "Dhiuru e mier man nyimu kendo udhi yudo kanyina moro motwe kuno gi nyathine ka nibute kanyo; gonygiuru mondo ukelnagi. ³Ka ng'ato owachonu gimoro amora to unyise ni Ruoth dwarogi, kendo gikanyono obiro miyougi mondo ukelnagi."

⁴Mano notimore mondo ochop gima nowachi gi dho janabi ni:

⁵"Nyisuru nyar Sayun ni, Ne Ruodhi echa biro iri, obiro komuol, kendo koidho wi kanyina; koidho kanyina mapod tin nono"

⁶Jopuonjre nodhi motimo kaka Yesu nochikogi. ⁷Ne gikelone kanyina gi nyathi kanyina, kendo negiketo kodegi e ng'egi, mi Yesu nobet kuomgi. ⁸Oganda maratipo nopedho kodegi e ndara, to jomoko to nong'ado bede yiende, kendo gin be negi pedhogi e ndara. ⁹Oganda mane otelo

nyime kod mago mane odong' chien nokok ni,

"Hosana ne Wuod Daudi!"
"Ogwedh ng'at mabiro e nying Ruoth!" "Hosana man malo mogik!"

¹⁰Kane Yesu odonjo Jerusalem to taon duto ne iye osakni kendo ji nopenjore kendgi ni, "Ma to ng'a?"

¹¹To oganda nodwokogi ni, "Ma en Yesu, janabi moa Nazareth, e piny Galili."

Yesu Odonjo E Hekalu

¹²Yesu nodonjo ei Hekalu mi noriembo oko joma ne ng'iewo kendo uso kanyo. Noloko mesni mag joma ne wilo pesa ataro kod kombe malach mag joma ne uso akuche, kendo ¹³nowacho ne ji ni, "Ondiki ni, 'Oda noluongi ni od lamo,' to un to uloke 'kar pondo mar jomecho.'"

¹⁴Muofni gi rong'onde nobiro ire e Hekalu kendo nochangogi. ¹⁵To ka jodolo madongo gi jopuonj chik noneno gik miwuoro mane otimo, kendo ka nyithindo kok ei Helalu ni, "Hosana ne Wuod Daudi, chunyi nokehore."

¹⁶Ne gipenje ni, "Be iwinjo gima nyithindogi wacho?"

Yesu nodwokogi ni, "Ee, awinjo. Kare pok usomo kama wacho ni,

"Ne isechano chon mondo pak owuogi, e dho nyithindo kod nyithindo mayom."

¹⁷Omiyo noweyogi, mowuok odhi e taon mar Bethani, kuma oninde otienono.

Yiend Ng'owo Oner

¹⁸Kinyne kogwen ka noyudo en e yo odok Jerusalem, kech ne kaye. ¹⁹Ka noneno yiend ng'owo moro e bath ndara, nobaro odhi ire, to ne ok oyudo gimoro amora kuome, makmana pote. Eka nowachone ni, "Kik ichak inyag olemo kendo!" Gikanyono yienno noner.

²⁰Ka jopuonjre noneno gima notimoreno, ne giwuoro, ka gipenje ni, "Ere

kaka yadh ng'owoni ne oner mapiyo kamano?"

²¹To Yesu nodwokogi ni, "Anyisou adier ni ka un-gi yie kendo uonge gi kiawa, to ok unyal mana timo gima ne otim ne ng'owoni, to unyalo bende wacho ne godni ni, 'Dhiyo mondo inyumri e nam,' kendo otim kamano. ²²Ka uyie to unuyud gimoro amora mukwayo e lamo."

Opingi Teko Yesu

²³Yesu nodonjo ei agola mar Hekalu, kendo ka noyudo opuonjo, jodolo madongo gi jodong oganda nobiro ire. Ne gipenje ni, "Itimo gigi gi teko mane, koso ng'a momiyi teko ma in-goni?"

²⁴Yesu nodwokogi ni, "An be abiro penjou penjo achiel, kendo ka udwoka, to abiro nyisou teko ma atimogo gigi. ²⁵Nyisae uru kuma batiso mar Johana noaye. Noa e polo, koso noa kuom dhano?"

Ne giwuoyo kuom wachni e kindgi giwegi ka giwacho ni, "Ka wawacho ni, 'Noa e polo,' to obiro penjowa ni, 'ka en kamano to ang'o momiyi ne udagi yie kuome?' ²⁶To ka wawacho ni, 'Noa kuom dhano,' to waluoro ji ni mar giduto gikawo ni Johana ne en janabi."

²⁷Omiyo ne gidwoko Yesu ni, "Wakia."

Eka nowacho negi ni, "An be ok abi nyisou kuma agole teko ma atimogo gigi."

Ngech Yawuowi Ariyo

²⁸"Uparo nade? Ne nitie ng'ato moro mane nigi yawuowi ariyo. Nodhi ir mokwongo mokone ni, 'Kawuono dhi iti e puoth mzabibu.'

²⁹"To nodwoko ni, 'Ok abi dhi.' Kata kamano bang'e achien noloko pache mi odhi.

³⁰Eka wuon-gino nodhi ir wuowi machielo monyise gima nonyiso wuowi mokuongo. To en nodwoko ni, 'Abiro dhi, jaduong', to ne ok odhi.

³¹Yesu nopenjogi ni, "Kuom yawuowi ariyogi, mane ma notimo gima wuon-gi

ne dwaro?"

Ne giduoke ni, 'Wuowi mokwongo.'

Yesu nowacho negi ni, "Anyisou adier ni josol osuru gi ochode kuongonu donjo e pinruodh polo. ³²Nimar Johana nobiro iru mondo onyisu yor tim makare, to ne ok uyie kuome, kata obedo ni josol osuru gi ochode to noyie kuome. Kendo kata bang' neno mano, pod ne udagi lokoru mondo uyie kuome."

Ngech Jorit Puodho

³³"Eri winjuru ngero machielo. Ne nitie wuon puodho moro mane opidho mzabibu e puothe. Nochiele gi ohinga, mi okunyo bur biyo mzabibu e iye, kendo ogerone osuch ng'icho. Eka ne oketo puothe mar mzabibuno e lwet jopur moko, kaeto owuok odhi e wuoth. ³⁴Kane kinde keyo koro chiegni, nooro jotichne ir jorit puothego mondo oomne olembe mowuok e puothe.

³⁵"To jorit puothego nomako jotichnego mi ogoyo achiel, onego moro kendo ogoyo machielo gi kite. ³⁶Eka nochako ooro jotich mamoko irgi; jotich mang'eny molooyo mago mane ooro mokwongo, kendo gin bende ne gitimo negi machalre. ³⁷Mogik tik nooro negi wuode, koparo ni, 'Wuoda to gibiro miyo luor.'

³⁸"To ka jorit puodhogo noneno wuod wuon puodho, ne giwacho e kindgi giwegi ni, 'Ma e jacham girkeni. Biuru wanega mondo girkeni odong'nwa'. ³⁹Omiyo ne gimake mi gidire oko mar puoth mzabibu kendo ne ginege.

⁴⁰"Koro, uparo ni ka wuon puoth mzabibu obiro to ang'o mobiro timo ne jorit puothego?"

⁴¹Ne gidwoke ni, "Obiro nego joma achachgo gi nek marach kaeto oketo puothe mar mzabibuno e lwet jorito manomako, ma nyalob miye olembege, ka kinde keyo ogik."

⁴²Yesu nowachonegi ni, "Donge usesomo e Ndiko ni:

"Kidi mane jogedo odagi osedoko kit gero konde ot, Ruoth ema oseti-

mo mano, kendo en gima lich ma wawuoro

⁴³Emomiyo anyisou ni pinyruodh Nyasaye ibiro gol kuomu mi mi oganda machielo ma biro nyago olemo mare. ⁴⁴Ng'ato ang'ata molwar e kidino biro tur matindo-tindo, to ng'ama kidino ema olwar kuome to biro regore ka buru."

⁴⁵Ka jodolo madongo gi jo Farisai nowinjo ngeche Yesugo, ne ging'eyo ni gin ema nowuoyo kuomgi. ⁴⁶Ne gichako manyo yo ma digimakego, to ne giluroo oganda, nikech ji nokawe ni en janabi.

Ngech Nyasi Mar Arus

22 Yesu nowuoyo kodgi kendo gi ngeche, kowacho ni, ²Pinyruodh polo chalo gi ruoth moro mane oloso nyasi mar arus ne wuode. ³Eka nooro jotichne ir joma ne oluongi e nyasi mondo odhi oluonggi gibi. To ne gidagi biro.

⁴Nochako ooro jotich mamoko, kowacho ni, "Dhiuru unyis joma noluongi ni aseiko chiemba: rwetha gi jamba machwe osenegi, kendo gik moko duto oikore. Omiyo biuru e nyasi mar arus."

⁵To ne ok gidewe, kendo moro ka moro kuomgi nowuok oweye odhi, moro e puothe, to machielo e ohande. ⁶Mamoko modong' to nomako jotichne mi osandogi kendo onegogi. ⁷Ruoth ne mirima omako matek. Nooro jolweny mage mi ne gidhi gitieko jotich ma jonekgo kendo giwang'o taondgi.

⁸"Eka nowacho ne jotije ni, "Nyasi mar arus koro oikore, to joma naluongo ne ok owinjore gi luong mane aluongogi-go. ⁹Kuom Mano dhiuru e yore madongo mag dala uluong ng'ato ang'ata muyudo mondo obi e nyasina. ¹⁰Omiyo jotich nowuok odhi e yore madongo mag dala mi ne gichoko ji duto mane ginyalo yudo, joma beyo gi joma richo, mi joma nobiro e arus nopong'o od budho

¹¹"To kane ruoth obiro mondo one welo, wang'e norado gi ng'at moro kanyo

mane ok orwako lep arus. ¹²Nopenje ni, 'Osiepna, ne idonjo e iye ka nade kionge gi lep arus?' To dho ng'atno nomoko.

¹³"Eka ruoth nonyiso joma ne rite ni, 'Tweuru bedene mondo udire oko ei mudho mandiwa, kama ywagruok gi muodo lak biro betie.'

¹⁴"Nimar joma iluongo ng'eny, to joma iyiero to tin."

Golo Osuru Ne Kaisar

¹⁵Eka jo Farisai nowuok odhi mondo gilos wach kaka ginyalo gaje gi wechene owuon. ¹⁶Ne gioro jopuonjregi ire, kaachiel gi jolup Herode, mi negipenje ni, 'Japuonj, wang'eyo ni in ng'ama ja ratiro kendo ni ipuonjo yor Nyasaye koluware gi adiera. Dhano odhana ok obadhi, nikech ok idew wang' ng'ato, bed ni en ng'ama nade. ¹⁷Koro nyiswa nade, iparo nade? Be en gima kare mondo ochiw osuru ne Kaisar, koso ok owinjore?"

¹⁸To kaka Yesu nong'eyo chenro marach mane gin-go, nowacho ni, "Un joma wuondoregi, ang'o momiyo utema?"

¹⁹Nyisae uru pesa ma mingli mitiyogo kuom golo osuru." Ne gikelone dinari, ²⁰eka nomedo penjogi ni, "Man kuomeni en picha ng'a, koso kidoni en mar ng'a?"

²¹Ne gidwoke ni, "En mar Kaisar."

Eka nowachonegi ni, "Miuru Kaisar gig Kaisar, to Nyasaye miuru gig Nyasaye"

²²Ka negiwinjo mano, to ne giwuoro. Omiyo ne giweye mi gia gidhi.

Wach Kend Chieng' Chier

²³Odiechieng' onogono jo Sadukai, ma wacho ni chier onge, nobirone gi penjo moro. ²⁴Ne gipenje ni, "Japuonj, Musa nonyisowa ni ka ng'ato otho ka oonge gi nyithindo to owadgi nyaka kaw chiege moweyono, kendo onywolnegi nyithindo. ²⁵Koro ne nitie owete abiriyo e dierwa. Mokwongo kuomgi nokendo to bang'e notho, to kaka ne oonge gi nyithindo, noweyo chiege ne owadgi. ²⁶Gima chal kamano notimore ne owadgi mar ariyo gi

mar adek, kendo nomakogi duto nyaka mar abiriyo. ²⁷Achien mogik dhakono be notho. ²⁸Koro, chieng' chier dhakono nobed chi ng'a kuom ji abiriyogi, nikech ne gibet kode giduto?"

²⁹Yesu nodwoko gi ka wacho ni, "Uketho nikech ukia ndiko kata teko Nyasaye. ³⁰Chieng' chier ji ok nokendi, kendo ok nokendgi. Ginichal gi malaike manie polo. ³¹To kuom chier mar joma otho, donge usesomo gima Nyasaye nowachonu, ni, ³²An Nyasach Ibrahim, Nyasach Isaka kendo Nyasach Jakobo.?" Nyasaye ok en Nyasach joma otho, to en Nyasach joma ngima."

³³Ka oganda nowinjo wachneno, ne gihum gi puonjne.

Chik Maduong' Mogik

³⁴Kane jo Farisai owinjo ni Yesu osen-g'eng'o jo Sadukai, ne gichokorene kaachiel. ³⁵Achiel kuomgi, mane en jabura molony ahinya, noteme gi penjoni: ³⁶"Japuonj, chik maduong' mogik kuom chikewa en mane?"

³⁷Yesu nowachone ni, "Her Ruoth Nyasachi gi chunyi duto, kendo gi tekri duto kendo gi pachi duto. ³⁸Ma e chik mokwongo kendo maduong' mogik. ³⁹To mar ariyo be chal kode kamano, ni 'Her nyawadu kaka iherori iwuon.' ⁴⁰Kitepe chik duto kod Jonabi omoko e chike ariyogi."

Kristo En Wuod Ng'a?

⁴¹Ka noyudo jo Farisai ochokore kaachiel, Yesu nopenjogi ni, ⁴²"Uparo nade kuom Kristo? En Wuod ng'a? Ne giduoke ni, "En Wuod Daudi."

⁴³Nowachonegi ni, "Ka en kamano to ang'o momiyo ka Daudi wuoyo ka en ei Roho to oluonge ni 'Ruoth'? Nimar owachoni,

⁴⁴"Ruoth nowacho ne Ruodha ni, "bed e bada korachwich nyaka chop aket wasiki e bwo tiendeni."

⁴⁵Koro ka Daudi ema luonge ni, 'Ruoth' to ere kaka onyalo bedo Wuode?" ⁴⁶To onge ng'ato kata achiel mane nyalo dwoke kata wach achiel, kendo chakre chieng'no kadhi nyime, onge ng'ama nohedhore medo penje penjo mamoko.

Chandruok Abiriyo

23 Eka Yesu nowachone oganda kod jopuonjrene ni, ²"Jopuonj chik gi jo Farisai bet e kom Musa. ³Omiyo nyaka uwinjgi kendo utim gik moko duto ma ginyisou. Kata kamano kik utim gik ma giyalo nikech ok gitim gik ma giyalo. ⁴Gitweyo misigo mapek kendo giyieyo e goke ji, to gin giwegi to ok giikore kata mar mulo misigogo gi lith lwetgi.

⁵"Gimoro amora ma gitimo gitimo mondo ji one. Kuom ranyisi, giloso boksi maggi moting'o kwan mag ndiko mimako gi wich madongo dongo, kendo gikado riak lepgi maboyo boyo. ⁶Bende gihero bet e mesni mamolo kuonde chiemo kendo e kombe moyiedhi e sunagoke. ⁷Gihero bende mondo omosgi e chirmi, kendo mondo ji oluonngi ni, 'Rabi.'

⁸"To un kik uyie oluonngu ni, 'Rabi,' nimar un gi Ruoth achiel kende, to un duto un owete. ⁹Be kik uluong ng'ato ang'ata e pinyka ni 'Baba,' nimar un gi Wuoro achiel kende, kendo en e polo. ¹⁰Kik luonngu kata ni, 'Japuonj,' nimar un gi Japuonj achiel, ma en Kristo. ¹¹Ng'ama duong' mogik e dieru nobed jatichu. ¹²Nimar ng'ato ang'ata mating'ore malo kende noduok piny, to ng'ama duokore piny noting' malo.

¹³"Malit ochomou, un jopuonj chik gi jo Farisai mawuondoregi! Uloro pinyruodh polo ka ji neno gi wang'gi kama. Un uwegi ok udonji, to joma temo mondo odonji be ugeng'onegi.

[¹⁴Malit ochomou, un jopuonj Chik gi jo Farisai, un muwuondorugi! Uyako ute mond liete, kendo ulamo lemo moyware, nikech udwaro mondo ji oneu. Emomiyo ibiro kumou malit molojo.]

¹⁵"Malit ochomou, un jopuonj chik gi jo Farisai mawuondoregi! Uwuotho alanda, kung'ado piny gi nembe mondo ulokie kata ng'ato achiel, to koselokore to umiyo obedo koth Gehena moloyou nyadiriyo.

¹⁶"Malit ochomou, jotecho ma muofnigi! Uwacho ni, 'Ka ng'ato okuong'ore gi nying Hekalu to onge wach, to ni ka ng'ato okuong'ore gi nying dhahabu mar Hekalu to kuong'ruokneno otweye.'

¹⁷Un muofni mofuwogi! Mane maduong'? Dhahabu koso Hekalu mamiyo dhahabu bedo gima owal?

¹⁸Bende uwacho ni, 'Ka ng'ato okuong'ore gi nying kama ler to onge wach, to ni ka ng'ato okuong'ore gi chiwo moket kuome to ni kuong'ruokneno otweye.' ¹⁹Un joma muofnigi! Mane maduong'? Chiwo koso kama ler mamiyo chiwo bedo gima owal? ²⁰Kuom mano, ng'ama kuong'ore gi nying kama ler ok kuong're mana gi kama ler kende, to okuong'ore koda ka gi gik moko duto manie iye. ²¹Kendo ng'ama kuong'ore gi nying Hekalu kuong'ore kode kaachiel gi Jal modak e iye. ²²Kamano bende, ng'ama okuong'ore gi nying polo okuong'ore bende gi kom loch mar Nyasaye, kaachiel gi Ng'ama obet e komno.

²³"Malit ochomou, un jopuonj chik gi jo Farisai mawuondoregi! Uchiwo achiel kuom apar mar gik ma mili mili kaka kado gi apoth kod onyulo. To ok usedewo gik madongo moloyo ma chik dwaro, kaka adiera gi kech kod yie. Ok onego uwe timo mutimogo, to magi bende nyaka utim. ²⁴Un jotecho ma muofnigi! Ung'udho kikun to ngamia to umuonyo!

²⁵"Malit ochomou, un jopuonj chik gi jo Farisai mawuondoregi! Uluoko kang'e agwata gi dis, to e igi to gipong' gi wuoro kod mer. ²⁶Jo Farisai ma muofnigi! Kuong uluok i agwata gi dis, eka ng'egi oko be biro bedo maler.

²⁷"Malit ochomou, un jopuonj chik gi jo Farisai mawuondoregi! Uchalo liete

mowir marachar, manenore maber gi oko, to gie iyegi to gipong' gi choke joma otho kod gimoro amora mogak. ²⁸Kamano e kaka un bende unenoru ne ji ni un joma beyo gioko, to gie iu to upong' gi wuondruok kod timbe maricho.

²⁹"Malit ochomou, un jopuonj chik gi jo Farisai mawuondoregi! Ugero liete jonabi kendo ogoro maber liete joma kare. ³⁰Bende uwacho ni, 'Ka dine bed ni wangima e ndalo mag kwerewa, dine ok wachwero remb jonabi.' ³¹Kuom mano ung'ado buchu uwegi ni un nyikwa joma nonego jonabi. ³²Kara koro dhiuru mana nyime gi chopo okang' mar richo mane kwereu ochako!

³³"Thuondegi! Kothe thuondu-gi! Ubiro tony nade mak ong'adnu buch Gehena? ³⁴Emomiyo eri koro aoronu jonabi gi joma riek kod jopuonj. Moko kuomgi ubiro nego kendo ubiro guro; moko ubiro rodho e sunagokeu kendo ubiro lawogi e taon. ³⁵Kuom mano, remo makare duto mosebedo kichwero e piny, chakre remb Abel nyaka remb Zakaria wuod Berakia, mane unego marach e kind Hekalu gi kama ler, ibiro keti e wiu. ³⁶Awachonu ni adier magi duto biro timore ne tieng'ni.

³⁷"Yaye Jerusalem- Jerusalem, in minego jonabi kendo ichielo joma oorni gi kite! Mano kaka asegombo aming'a mondo achok nyithindi kaachiel, kaka gweno choko nyithinde e bwo buombene, to isetamori. ³⁸To koro, ne, odi oweni kodong' gunda. ³⁹Nimar awachoni ni, ok ibi ichak inena kendo nyaka chop chieng' ma iniwachie ni, 'Ogwedh ng'at mabiro e nying Ruoth."

Ranyisi Mag Ndalo Giko

24 Yesu noa e Hekalu kendo ka noyudu owuotho odhi, jopuonjrene nobiro ire mondo onyise kaka gedo mag Hekalu lich. ²To nopenjogi ni, 'Be uneno gigi duto? Anyisou adier ni kata kidi achiel kuom munenogi ok nodong' ewi wadgi, to moro ka moro kuomgi nodir

piny.”

³Ka noyudo Yesu obet ewi Got Zeituni Jopuonjre nobiro ire kar kende mowachone ni, “Nyiswae. gigi biro timore karang’o, kendo ang’o mabiro bedo ranyisi mar bironi kod mar giko mar ndalo?”

⁴Yesu nodwokogi ni, “Beduru motang’ mondo ng’ato kik wuondu. ⁵Nimar ji mang’eny nobi e nyinga ka hedhore ni, ‘An e Kristo,’ kendo giniwuond ji mang’eny. ⁶Unuwij kuom lwenje ma gore koni gi koni kod humbe mag lwenje, to neuru ni ok ubuok. Gik ma kamago nyaka timre, to giko to pod nobed nyime. ⁷Oganda nowuog ne oganda machielo, kendo pinyruoth gi pinyruoth wadgi. Kech nobedi kuonde mang’eny kendo piny noyiengni kuonde mopogore opogore. ⁸Magi duto nobed mana chakruok mar muoch makecho.

⁹Eka nochiwu mondo osandu kendo onegu, kendo ogendini duto nochau nikech an. ¹⁰E kindeno ji mang’eny nolokre miwe yie kendo ginindhogre kendo gichare kendgi, ¹¹bende joma wuondore ni gin jonabi to ok gin nobi mang’eny kendo giniwuond ji mang’eny. ¹²Nikech timbe maricho nomedre, hera mar ji mang’eny nodok mang’ich, ¹³to ng’ama ochung’ motegno nyaka giko noresi. ¹⁴Kendo Injili ni mar pinyruoth noyal e piny duto mondo ong’ad bura ne ogendini duto, eka giko nobi.

¹⁵Omiyo ka uneno ‘gima kwero makelo kethruok,’ mane owuo kuome gi dho Daniel, kochung’ kama ler (dwarore ni jasomo owinj tiend wachni maber) ¹⁶to eka joma ni Judea odar odhi ewi gode. ¹⁷To ng’at manie wi ode kik lor piny mondo okaw gimoro amora manie ot mondo oago. ¹⁸Ng’at manie puodho bende kik dog dala mondo okaw kode. ¹⁹Mano kaka mon ma yach kod mago madhodho nyithindo none malit e ndalogo! ²⁰Lamuru Nyasaye mondo dar maru kik timre ndalo chwiri kata chieng’ Sabato. ²¹Nimar kindego chandruok

maduong’ nobedi maonge machielo minyalo pimogo aa chakruok piny nyaka sani, kendo onge moro mabiro romo kode kata ndalo mabiro. ²²Ka dine bed ni ok ong’ad ndalogo machiek to ok ng’ato dotony, to nikech wach joma oluongi, ndalogo ibiro ng’ado machiek. ²³E kindeno ka ng’ato owachonu ni, ‘Ne, Kristo ni ka!’ kata ni, ‘Echago cha!’ to kik uyie wachno. ²⁴Nimar joma wuondore ni gin Kristo to ok gin kod joma wuondore ni gin jonabi to ok gin nothinyre kendo ginitim ranyisi gi honni madongo mondo giwuondgo koda ka joma oyier, ka dipo mano ditimre. ²⁵Ero, asenyisou chon kapok kindeno ochopo.

²⁶Omiyo ka ng’ato nowachnu kindego ni, ‘Echago cha en e thim’, to kik uwuogi udhi; kata ni, ‘Erigo en ei ot maiye,’ to kik uyie wachno. ²⁷Nimar mana kaka mil polo ji duto neno chakre wuok chieng’ nyaka podho cheing’ Dhano be nobedi. ²⁸Kama gimoro othoe ema achudhe nochokree.

²⁹Gikanyono bang’ chandruok maduong’ mag ndalono

“Wang’ chieng’ noimre, kendo dwe ok norieny: Sulwe nolwar piny koa e polo, kendo chwech mag polo noyiengni,

³⁰Eka ranyisi mar Wuod Dhano nothinyre e kor polo, kendo ogendini duto mag piny noywagi. Ginine Wuod Dhano ka lor biro e boche polo, ka en gi teko kod duong’ mang’ongo. ³¹Kendo enoor malaikage, koluongogi matek gi tarumbete, kendo ginichok joge moyier koa kuonde duto e piny, chakre giko polo konchiel nyaka komachielo.

³²To puonjreuru wachni kuom yiend ng’owo: Ka bedene chako mich kendo pote chot lwar, to ung’eyo ni oro chiegni. ³³Kamano bende, ka unune gigi duto, to unung’e ni kindeno chiegni, kendo osechopo mana e dhoot. ³⁴Akonu adier ni tieng’ni ok norum ngang’ kapok gigi duto otimore. ³⁵Polo gi piny norum, to

Wechena ok norum ngang'.

Odiechieng' Gi Saa Ok Ong'ere

³⁶"Onge ng'ato ang'ata mong'eyo odiechieng' no kata sano, obed malaike manie polo kata Wuowi, mak mana Wuoro kende. ³⁷Mana kaka notimore e ndalo Noa e kaka nobedi chieng' ma Wuod Dhano nobi. ³⁸Nimar e ndalo mane pok pi opong'o piny, ji ne chiemo kendo metho, bende negi kendo kendo ikendogi, nyaka nochopo odiechieng' mane Noa odonjo e meli, ³⁹kendo onge gima ne ging'eyo kuom gima ne biro timore nyaka pi nobiro moywerogi duto te. Kamano e kaka nobedi e biro Wuod Dhano. ⁴⁰Chwo ariyo nobedi e puodho, achiel nokaw to machielo nowe. ⁴¹Mon ariyo noyudi ka rego e pong' lwedo; achiel nokaw to machielo nowe.

⁴²"Emomiyo nenuru nikech ukia chieng' ma Ruodhu nobie. ⁴³To winjuru tiend wachni: Ka dine bed ni wuon ot nong'eyo ni saa adi mar otieno ma jakuo biroe, dine osiko korito, kendo dogeng'o jokuoge turo dhode mi donji e ode. ⁴⁴Kamano bende e kaka un bende onego ubed moikore, nikech Wuod Dhano biro biro e sama ok upar ni dobie.

⁴⁵"Kare jatich ma jaadiera kendo mariek en ng'a, ma ruodhe oseketo nya-para mar jotichne morito ode, mondo omigi chiembgi e saa mowinjore? ⁴⁶Ogwedh jatich ma kamano, ma ka ruodhe oduogo to noyude kotimo gima noweye notim. ⁴⁷Anyisou adier ni, obiro kete jarit gige duto. ⁴⁸To ka po ni jatijno timbene richo, mit owacho e chunye ni, 'Ruodha odeko oko ahinya,' ⁴⁹kaeto obukre gi goyo jotich wetene, kendo owere ne chiemo gi metho kaachiel gi jomer, ⁵⁰to ruodh jatijno nobi e odiechieng' ma ok ogen ni dobie, kendo e saa mokia. ⁵¹Enong'ade matindo tindo mi okete kaachiel gi joma wuondore, kama ywagruok gi muodo lak nobedie.

Ngech Nyiri Apar

25 "E kindeno pinyruodh polo nopim gi nyiri apar ma nokawo techegi kaeto owuok odhi romo ne wuon kiser. ²Abich kuomgi nofuwo, to abich ne riek. ³Mago mofuwo nokawo techegi to ne ok giting'o mafuta kata matin gidhigo. ⁴To mago mariek to noting'o mafuta e kubni kaachiel gi techegi. ⁵Wuon Kiser noka-wo saa mathoth kapok obiro, omiyo wengegi nobedo mapek kargi duto mi nindo noterogi.

⁶"To e chuny otieno koko moro nogore matek ni, 'Wuon kiser eri odonjo! Wuoguru oko mondo uromne!'

⁷"Eka nyiri duto nochiew kendo ne giiko techegi. ⁸Nyiri mofuwo nowacho ne mago mariek ni, 'Pognwauru mafuta matin, nikech techewa dwa tho.'

⁹"To ne gikwerogi ni, 'Ooyo,' samoro mafuta ma wan-go ok nyal romowa kaachiel kodu. Gima ber en ni dhiuru ir joma uso mafuta mondo eng'iew maru kuomgi.'

¹⁰"To ka noyudo gin e yo gidhi ng'iewo mafuta, wuon kiser nochopo. Nyiri mane oikore nodonjo kode e nyasi mar arus; kendo nolor dhoot.

¹¹"Bang'e achien nyiri mamokoka be nobiro. Ne gidwong'o ka giwacho ni, 'Jaduong'! Jaduong'! Yawnwa dhoot!'

¹²"To noduokogi ni, 'Anyisou adier ni akiau.'

¹³"Emomiyo nenuru, nikech ok ung'eyo odiechieng' kata saa

Ngech Talanta

¹⁴"Enochal bende gi ng'at moro ma ka ne owuok odhi e wuoth to nolwongo jotichne mi oketo mwandune e lwetgi.

¹⁵Achiel kuomgi nomiyo pesa moromo talanta abich, to machielo nomiyo talanta ariyo, kendo machielo talanta achiel; komiyo moro ka moro kuomgi pesa maromre gi nyalone. Eka nodhi e wuodhe. ¹⁶Ng'ama nomi talanta abich nodhi sano

sano moketo pesane e tich, kendo noyudo talanta abich mamoko kaka ohande. ¹⁷Kamano bende, ng'at mane omi talanta ariyo noyudo ariyo ewi mane omiye. ¹⁸To ng'at mane oyudo talanta achiel nowuok odhi mokunyo bur ei lo, kendo oiko pesa ruodhe kanyo.

¹⁹"Bang' kinde marabora ruodh jotij-go noduogo kendo nogoyo kodgi kwano.

²⁰Ng'at ma noyudo talanta abich nokoelo talanta abich mamoko ewi mane omiye, kendo nowacho ne ruodhe ni, 'Ruoth, ne imiya talanta abich, to neye, aseloso abich mamoko e wiye.'

²¹"Ruodhe nodwoke ni, 'Isetimo maber ahinya. In jatich maber kendo ma jaadiera! Isebedo jaadiera gi gik matin nono omiyo koro abiro keti jarit gik mang'eny. Bi idonji e mor mar ruodhi!'

²²"Ng'at manenigi talanta ariyo bende nobiro, mowacho ni, 'Ruodha, ne imiya talanta ariyo, to neye, aseloso ariyo mamoko.'

²³"Ruodhe nodwoke ni, 'Isetimo maber ahinya. In jatich maber kendo ma ja adiera! Isebedo ja adiera gi gik matin nono, omiyo koro abiro keti jarit gik mang'eny. Bi idonji e mor mar ruodhi!'

²⁴"Eka ng'at ma noyudo talanta achiel nobiro, mowacho ni, 'Ruoth, Ne ang'eyo ni in ng'ama tiyogo tek, ma keyo kama ne ok ikome, kendo ma choko kama ne ok aludoe kodhi. ²⁵Omiyo ne aluor mi ne adhi kendo ne apando talantani ei lo. Girino eri kawe.'

²⁶To ruodhe nodwoke ni, 'In jatich ma kite rach kendo ma jasamuoyoni.' Kare ne ing'eyo ni akeyo kama ne ok akome kendo ni achoko kama ne ok aludoe kodhi? ²⁷Ka kamano to mad ne iket pesana gi jo bengi kama nonyalo medoree kende, mondo ka ne aduogo to ayude gi ohande.

²⁸"Omiyo mayeuru talantano mondo umi ng'at ma nigi talanta apar. ²⁹Nimar ng'at ma nigo ema nomedi, mi nobed gi gik mogundho; to ng'at ma ongego ibiro ma koda ka gima en-go. ³⁰Koro kawuru jatich manonono udhir oko e mudho,

kama ywagruok gi muodo lak nobedie.'

Rombe Gi Diek

³¹"Ka Wuod Dhano nobi e duong'ne, kaachiel gi malaiké duto, enobed e kom lochne, man gi duong' mar polo. ³²Ogendini duto nochokre e nyime, kendo enopog ji, kopogo ng'ato ka ng'ato gi wadgi, mana kaka jakwath pogo rombe kogolo e dier diek. ³³Enoket rombe e bade korachwich, to diek e bade koracham.

³⁴"Eka Ruoth nowachne joma nie bade korachich ni, 'Biuru, un joma ogwedhi mag Wuora; Kawuru girkeni maru, pinyruoth mane oiknu nyaka aa chwech piny. ³⁵Nimar ne adenyo kendo numiya gimoro achamo; riyo noloya, kendo numiya gimoro amodho; ne an wendo; kendo nurwaka ei ot; ³⁶ne achando lewni, kendo nurwaka; ne atuog kendo nurita; ne an e jela, kendo nubiro lima.'

³⁷"Eka jomakarego nodwoke ni, 'Ruoth, karang'o mane wanenie kidenyo mi wamiyi chiamo, kata ka riyo oloyi, mi wamiyi gimoro imodho? ³⁸Karang'o mane wanenie ka in wendo mi warwaki ei ot, kata kichando lewni mi warwaki? ³⁹Ne waneni karang'o kituo kata ka in jela mi walimi?'

⁴⁰"To Ruoth nodwokgi ni, Anyisou adier ni, gimoro amora mane utimo ne achiel kuom owetenagi matinie mogik, ne utimona.'

⁴¹"Eka enowach ne joma nie bade koracham ni, "Ayiuru buta, un joma okuong'gi, mondo udonji ei mach mosiko mane olosi ne Jachien gi malaiké. ⁴²Nimar ne adenyo, to onge gima numiya mondo acham; riyo noloya, to onge gima numiya mondo amodhi; ⁴³ne an wendo, to ne ok urwaka ei ot; ne achando lewni, to ne ok urwaka; ne atuog kendo ne an e jela, to ne ok ulima?'

⁴⁴"To gin bende ginidwok ni, 'Ruoth, ne waneni karang'o kidenyo, kata ka riyo oloyi, kata ka in wendo, kata kichando lewni, kata kituo, kata ka in e jela, to ne ok wakonyi?'

⁴⁵"To enodwokgi ni, 'Anyisou adier ni, gimoro amora mane ok utimo ne achiel kuom joma tindogi, ne ok utimo ne an.'

⁴⁶"Eka gini aa kanyo mi gidonji e kum mochwere, to joma kare e ngima mochwere."

Chenro Mar Nego Yesu

26 Ka Yesu nosetieko wacho wehegi duto, nowacho ne jopuonjrene ni, ²⁷"Kaka ung'eyo, odong' ndalo ariyo kende mondo chieng' Pasaka ochopi, kendo Wuod Dhano ibiro chiwo mondo ogur."

³Eka jodolo madongo gi jodong oganda nochokore e dala jadolo maduong', mane nyinge Kaifa, ⁴kendo ne gichano mondo gimak Yesu e yo mobam ginege. ⁵To ne giwacho ni, "Kik watim kamano kinde nyasi, nono to ji ogomo."

Owir Yesu Bethani

⁶Kane Yesu ni Bethani e dala ng'at moro miluongo ni Simon ja dhoho, ⁷dhako moro nobiro ire gi chupa mar alabasta, mopong' gi mo madung' mamit kendo ma nengone tek, kendo noole duto e wiye sama nobet kochiemo e mesa. ⁸Ka jopuonjre noneno mano, ne gisin, mi giwacho ni, "Morni iketho malit kama nang'o?" ⁹Donge morni ne inyalo uso e nengo mamalo mondo omi jodhier pesago."

¹⁰To kaka Yesu nong'eyo pachgino, nowacho negi ni, "Uchando dhakoni nang'o? Osetimona gima jaber. ¹¹Jodhier ubiro siko ka un-go ndalo duto to an ok ubi siko ka un koda ndalo duto. ¹²Ka dhani noolo mo madung' mamitni e denda, notimo kamano mondo oikago ne ik. ¹³Anyisou adier ni kamoro amora ma noyalie Injilini e piny duto to gima osetimoni bende nohul, kiparego."

Judas Ovie Ndhogo Yesu

¹⁴Eka achiel kuom ji apar gariyogo, mano mane iluongo ni Judas Iskariot, nodhi ir jodolo madongo, ¹⁵mopenjogi ni, "Ang'o mubiro miya ka achiwe e lwetu?"

Omiyo ne gikwanone pesa mamingli mag fedha piero adek. ¹⁶Chakre chieng'no kadhi nyime Judas nochako manyo thuolo mar chiwengji.

Pasaka Mar Ruoth

¹⁷Odiechieng' mokwongo mar nyasi mar makati maonge thowi, jopuonjre nobiro ir Yesu mopenje ni, "Kanye midwaro ni waikni mondo ichamie Pasaka?"

¹⁸Nodwoko ni, "Dhiuru nyaka ei dala ir ng'at moro kendo uwachne ni, 'Japuonj wacho kama: sana mane ochanna chiegni chopo, omiyo abiro timo nyasi mar Pasaka gi jopuonjrena e odi.' ¹⁹Omiyo jopuonjre notimo kaka Yesu nochikogi kendo ne giiko Pasaka.

²⁰Ka odhiambo nochopo, Yesu nobet kachiemo e mesa kaachiel gi ji apar gariyogo. ²¹To ka noyudo gichiemo, nowacho ni, "Anyisou adier ni achiel kuomu biro ndhoga."

²²Chunyi nodoko malit ahinya, kendo ne gichako wachone moro ka moro ni, "Ruoth, dobed an koso?"

²³Yesu nodwoko ni, "Ng'at ma oa luto lwete koda e bakul biro ndhoga. ²⁴Wuod Dhano biro dhi mana kaka nondiki kuome. To chandruok ochomo ng'at mandhogo Wuod Dhano! Dine ok onywole dobedone maber moloyo.

²⁵Eka Judas, jal mane biro ndhoge nowacho ni, "Japuonj, dobed an koso?"

Yesu nodwoko ni, "Ee, en in."

²⁶Ka noyudo gichiemo, Yesu nokawo makati kendo nogwedhe kendo opoge, kaeto omiyo jopuonjrene, kowacho ni, "Kawuru, chamuru; ma en ringra."

²⁷Eka nokawo okombe kendo nogwedhe kaeto omiyogi kowacho ni, "Madhuru gima nie iye, un duto. ²⁸Ma en remba mar winjruok, ma ool oko ne ji mang'eny mondo okel werruok mar richo. ²⁹Anyisou ni ok anachak amadh olemb msabibuni kendo, chakre kawuono nyaka chop odiechiengno ma anamadhe manyien, kaachiel kodu, e pinyruoth mar Wuora."

³⁰Kane gisewero wer moro, ne giwuok gidhi nyaka Got Zeituni.

Yesu Okoro Ni Petro Biro Kwede

³¹Eka Yesu nonyisogi ni, "Otienoni un duto wang' unupodhi nikech an, nimar ondiki ni,

"Abiro goyo jakwath, kendo kweth mag rombe biro ke."

³²To bang' ka asechier anadhi ka atelo nyimu nyaka Galili."

³³Petro nodwoko ni, "Kata ka ji duto opodho nikech in to an ok anapodhi ngang'."

³⁴Yesu nodwoko ni, "Awachoni adier ni otienoni, kapok thuong gweno okok, wang' inikweda nyadidek"

³⁵To Petro nowacho koramo ni, "Kata ka ochuno ni nyaka atho kodi, to ok abi kwedi ng'ang', kendo jopuonjre mamoko duto bende nowacho machalre kamanu.

Gethsemane

³⁶Eka Yesu nodhi gi jopuonjrene nyaka kama iluongo ni Gethsemane, kendo nowachonegi ni, "Beduru ka kapod adhi nyime kucho mondo alam."

³⁷Nokawo Petro kod yawuot Zebedi ariyo odhigo, kendo kuyo gi chuny lit nochako make. ³⁸Eka nowachonegi ni, "Kuyo ohewo chunya kendo chiegni nega. Beduru ka kendo nenuru kaachiel koda."

³⁹Ne ochwalore nyime matin kaeto opodho piny gi yoka lenda wang'e eka olemo ni, "Wuora, kanyalore to yie mondo kikombeni ogol kuoma. To ok kaka an ema adwaro to mana kaka in ema idwaro."

⁴⁰Nodok ir jopuonjrene moyudo ka ginindo. Nopenjo Petro ni, "Joka ma, ne ok unyal rito koda kata kuom saa achiel kende?" ⁴¹Nenuru kendo lamuru mondo kik upodhi e tem. Chuny oikore to ringruok to nyap."

⁴²Ne owuok odhi kendo, mar ariyo, kendo nolamo ni, "Wuora, ka ok nyalre mondo ogol okombeni makmana ka amadhe to dwaroni otimre."

⁴³Kane oduogo, nochako oyudogi ka ginindo, nikech wengegi ne pek. ⁴⁴Omiyo ne oweyogi, kendo nochako owuok modok mi olemo mar adek, kowacho gima chalre.

⁴⁵Eka noduogo ir jopuonjrene mowachochi negi ni, "Pod unindo aninda kendo uyweyo? Neuru, saa osechopo, kendo wuod dhano koro indhogo e lwet joricho. ⁴⁶Chunguru wadhuru. Jandhokna eri biro e!"

Yesu Omaki

⁴⁷Ka noyudo pod owuoyo, Judas, mane en achiel kuom ji apar gariyo, nochopo. Ne en gi oganda maduong' momanore gi ligangla gi arunge, mane oor koa ir jodolo madongo gi jodong oganda. ⁴⁸To noyudo jandhok osechano kodgi motelo ranyisi mane obiro tiyogo: "Ng'at ma wang' ananyodhi e en; makeuru." ⁴⁹Judas nopusore piyo piyo nyaka ir Yesu, kaeto owachochi ni, "Misawa Rabi!" kendo ne onyodhe.

⁵⁰To Yesu nodwoko ni "Osiepnna, tim gima nokeli.

Eka jogo nochorore nyime mi ondhiyo Yesu, kendo ne gimake. ⁵¹Gikanyono achiel kuom joma ne nigi Yesu nowuodho liganglane oko, kendo notong'o jatij jado-lo maduong', mi ochodo ite oko.

⁵²Yesu nowachone ni, "Dwok liganglani e ode, nimar ji duto ma wuodho ligangla notho gi ligangla. ⁵³Iparo ni ok anyal kwayo Wuora mi oketna tenge kidienje apar gariyo mag malaike mondo okedna sanisani?" ⁵⁴To ka otimo kamanu to Ndiko dichop kare nade mawacho ni gik moko nyaka timre kaka gitimore sani-ni?"

⁵⁵E sechego Yesu nowacho ne ogandano ni, "Uwuokna oko gi ligengni kod arunge kagima akelo tulu kamanu nang'o? Pilepile asebedo ka abet kodu piny e agolni mag Hekalu ka apuonjo, to ne ok umaka. ⁵⁶To gima timoreni osetimore kama mondo Ndiko mag jonabi ochopi." Eka jopuonjre duto nong'wel moringowe.

Yesu E Nyim Sanhedrin

⁵⁷Joma nomako Yesugo nokawe motere nyaka ir Kaifas jadolo maduong', kuma jopuonj chik kod jodongo noyudo osechokoree. ⁵⁸To Petro noluwe gichien, nyaka notundo e laro mar jadolo maduong'. Nodonjo kendo nobet piny kod jorito mondo one ane gima nebiro timore.

⁵⁹Jodolo madongō gi jo Sanhedrin duto ne manyo nend miriambo moro mane ginyalo donjonego Yesu mondo eka ginege. ⁶⁰To ne ok giyudo moro amora, kata obedo ni jonend miriambo mang'eny nosuosore nyime.

Achien mogik, ariyo nobiro nyime, ⁶¹kendo ne giwacho ka giramo ni, "Ng'atni nowacho ni, Anyalo muko Hekalu mar Nyasayeni mi achak agere kendo bang' ndalo adek."

⁶²Eka jadolo maduong' noa malo mowacho ne Yesu ni, "Dak iduok wachno? Neno ma jogi timo kuomini manade?"

⁶³To Yesu noling' aling'a thi.

Jadolo maduong' nowachone ni, "Achiki ka akuong'ore gi nying Nyasaye Mangima: Nyiswa ka in e Kristo ma Wuod Nyasaye."

⁶⁴Yesu nodwoke ni, "E en kaka iwachono. To awachonu un duto ni e ndalo mabiro unune Wuod Dhano kobet e bat korachwich mar Jal Maratego kendo kobiro kobet e boche polo."

⁶⁵Eka jadolo maduong' noyiecho lepe, kowacho ni, "Oseyeny! Ere gimomiyo pod wadwaro joneno mamoko? Neuru, koro wasewinjo gi itwa ayanjeno. ⁶⁶Unu paro nade?"

Ne gidwoko ni, "Owinjore gi tho."

⁶⁷Eka ne ging'ulo olawo e lenda wang'e, kendo ne gigoye ngum. Jomoko to nopame, ⁶⁸ka giwacho ni, "Kornwae wach ane, Kristo, En ng'a mopadi?"

Petro Okwedo Yesu

⁶⁹Sama noyudo Petro obet oko e laro, jatich manyako moro nobiro ire mowachone ni, "In bende ne in gi Yesu ja Galili."

⁷⁰To nodagi wachno e nyimgi duto,

kowacho ni, "Akiya gima iwachono."

⁷¹Eka nong'wel odhi e dho rangach, to kuno bende nyako machielo nonene mi owachone joma ne nikanyo ni, "Ng'atni ne jonigi Yesu ja Nazareth."

⁷²To nodagi wachno kendo nokuong'ore kowacho ni, "Akiya ng'atno!"

⁷³Bang' saa matin, joma nochung' kanyo nodhi nyaka but Petro mowachone ni, "Ka iwacho adier, to in achiel kuomgi, nikech yo miwuoyogo huli e iro."

⁷⁴Eka nochako luongo kuong' kuome owuon laramo ni, "Akiya ng'atno adier!"

Sanosano thuoŋ gwenō moro nokok. ⁷⁵Eka Petro noparo wach ma Yesu noyudo osewachone ni, "Kapok thuoŋ gwenō okok, to wang' inikweda ndalo adek." Kendo nowuok odhi oko mi oywak malit.

Judas Odere Owuon

27 Okinyi kogwen, jodolo madongo duto gi jodong' oganda noporo wach ni mondo gineg' Yesu. ²Ne gitweye kendo ne giwuok kode mi gikete e lwet Pilato, mane en ruoth.

³Ka Judas, jal mane ondhoge oneno kose ng'adne Yesu buch tho, achiedhnade nomake mi nodwoko pesa mamingli mag fedha piero adek ne jodolo madongo gi jodongo, ⁴kowacho ni, "Aseketho, nimar asendhogo remo maonge ketho."

To ne gidwoke ni, "Mano obadhowa e ang'o? Mano en wachni iwuon."

⁵Omiyo Judas nowito pesago ei Hekalu kaeto oa odhi. Eka nodhi modere.

⁶Jodolo madongo nokwanyo ng'injo mag fedhago kendo giwacho ni, "Chik ok oyie mondo okan gini kar keno, nikech en pesa remo." ⁷Omiyo ne giporo wach mondo giti gi pesago kuom ng'iewo puoth jachwe agulini mondo obed kama ilke jodak. ⁸Mano emomiyo osebedo kiluongo kanyo ni puoth remo nyaka kawuono. ⁹Eka gima Jeremia janabi nowacho ni, "Ne gikawo pesa mamingli mag fedha, mane en nengo mane jo Israel oketone, ¹⁰kendo ne gitiyo kodgi kuom ng'iewo puoth

jachwe agulni, kaka Ruoth nochika,"
nochopo kare.

Yesu E Nyim Pilato

¹¹E thuolono Yesu nochung' e nyim ruoth, kendo ruoth nopenje ni, "In e ruodh jo Yahudi koso?"

Yesu nodwoke ni, "Ee, en kaka iwachono."

¹²Kane jodolo madongo gi jodongo odonjone, ne ok odwoko gimoro amora.

¹³Eka Pilato nopenje ni, "Donge iwinjo neno ma jogi donjonigogi?" ¹⁴To Yesu ne ok odwoko kata wach achiel mane odonjonego, kendo mano nomiyo ruoth owuoro ahinya. ¹⁵To ruoth noheroga gonyo ne oganda ng'at achiel motwe e kinde mag sawo. ¹⁶Endalono ne gin gi ng'at motwe ma achach mane iluongo ni Barabas. ¹⁷Omiyo ka oganda nosechokore kaachiel, Pilato nopenjogi ni, "En ng'awa mudwaro mondo agonynu: Barabas koso Yesu miluongo ni Kristo?" ¹⁸Nimar nong'eyo ni ich lit ema nomiyo giketo Yesu e lwete.

¹⁹Ka noyudo Pilato obet e kom jong'ad bura, chiege nokowone wach ni, "Walri iayi e wach ng'at maonge kethono, nimar wachne nochanda ahinya kawuono e lek mane aleko kuome."

²⁰To jodolo madongo gi jodongo nowako oganda mondo Barabas ema gikwa ogonynegi to Yesu to mondo onegi.

²¹Ruoth nopenjogi ni, "Kuom ji ariyoggi, en ng'a mudwaro mondo agonynu?"

Ne gidwoke ni, "Barabas."

²²Pilato nopenjogi ni, "To Yesu miluongo ni Kristoni to atimgo ang'o?"

Ne giduoke riat ni, "Gure!"

²³Pilato nopenjo ni, "Nang'o? En ang'o marach mosetimo?"

To gin ne gimedgo goyo koko matek moloyo ni, "Gure!"

²⁴Ka Pilato nonono ni onge gima nonyalo timo, to ni mahu ema koro ne chakore, nokawo pi mi ologo e nyim ogandano, kowacho ni, An aler kuom rembang'atni, en wachu!"

²⁵To ji duto nodwoko riat ni, "Rembe mondo obed e wiwa gi nyithindwa!"

²⁶Eka nogonyonegi Barabas, to Yesu to nokwongo orodho, eka oketo e lwetgi mondo ogur.

Askeche Ojaro Yesu

²⁷Eka askeche ruoth nokawo Yesu motere nyaka ei od chokruok, kendo ne gichokone oganda askeche duto mi gilwore gikete diere.

²⁸Ne gilonyo lepe kendo ne girwakone kandho makwar, ²⁹eka ne gikado ligisa mar kudho kendo gisidho e wiye. Ne giketo odundu e lwete kor achich, eka gigoyo chonggi piny e nyime, kendo ne ginyiere ka giwacho ni, "Misawa, ruodh jo-Yahudi!" ³⁰Ne ging'ulo olawo kuome kendo ne gikawo odundu gigoyogo wiye anuoya anuoya. ³¹Bang' ka negisejare kamano, ne gilonyo kandho no oko kaeto girwakone lepe owuon. Eka ne giwuok gidhi kode mondo gidhi gigure.

Gur Mar Yesu

³²Kane gin e yo gidhi, ne giromo gi ja-Kurene moro miluongo ni Simon, kendo ne gichune mondo oting' msalaba. ³³Eka ne gichopo kama iluongo ni Golgotha (ma tiende en kar Hanga Wich). ³⁴Kanyo ne gimio Yesu divai moru gi kedhno mondo omadhi, to bang' bile, nodagi madhe. ³⁵Ka negise-gure, ne gipogore lepe ka gigoyo ombulu. ³⁶Bang'e ne gibet piny kanyo ka girite. ³⁷Gimalo yoka wiye, ne gigureo ndiko mar weche mane odonjonego, mane wacho kama: MA EN YESU, RUODH JO YAHUDI. ³⁸Jomecho ariyo be nogur kode, moro e bathe korachwich to machielo koracham. ³⁹Joma ne kadho machiegni nodirone ayenje, ka gikino wiyegi, ⁴⁰kendo giwacho ni, "In ma yande iwacho ni inyalo ketho Hekalu mi ichak igere bang' ndalo adekni, koro resri kendi ane! Ka in wuod Nyasaye to wuog ane e msalaba ilor piny!"

⁴¹Machalre kamano bende, jodolo madongo gi jopuonj chik kod jodongo bende noyanye, ka giwacho ni, ⁴²"Ne oreso jomoko, to en to ok onyal resore owuon! Donge en ruodh Israel? Dak koro oa e wi msalaba olor piny ka sani mondo wayie kuome. ⁴³Ogeno kuom Nyasaye; Nyasaye koro okonye ane sani ka odware adier, nimar ne owachoga ni, 'An Wuod Nyasaye,'" ⁴⁴Kamano bende e kaka jomecho mane ogur kode bende nodirone ayenje.

Tho Mar Yesu

⁴⁵Chakre saa auchiel nyaka saa ochiko, mudho noimo piny duto. ⁴⁶To kar saa ochiko, Yesu noywak gi duol maduong' ni "Eloi, Eloi, lama sabakthani?- ma tiende en ni, "Nyasacha, Nyasacha, ang'o momiyo iseweya kenda?"

⁴⁷Kane moko kuom joma nochung' kanyo owinjo mano, ne giwacho ni, "Oluongo Elija."

⁴⁸Gikanyono achiel kuomgi noringo okawo siponj. Nonyume e kong'o makech, kendo nochome ewi odundu mabor, kaeto omiye Yesu mondo omadhi.

⁴⁹Joma moko nowacho ni, "Koro warit wane ane ka Elija biro mondo orese."

⁵⁰To bang' ka Yesu noseywak kendo matek gi duol maduong', nogonyo chunye mondo oa.

⁵¹Sanosano katen mar Hekalu noyiech e diere tir, chakre malo nyaka piny. Piny noyiengni kendo lwendni nobarore. ⁵²Liete nomuoch moyawore kendo ringre jomaler mang'eny mane osetho nochier modoko mangima. ⁵³Ne giwuok e liete, kendo bang' chier mar Yesu, ne gidonjo ei Dala Maler kendo ne gifwenyore ne ji mang'eny.

⁵⁴Ka ja-Kenturo gi joma ne nikode mane rito Yesu nonono yiengni mar piny kod gik moko duto mane oyudo osetimore, luoro nomakogi matek,

kendo ne giwacho ka giwuoro ni, "Adier, ng'ani ne en Wuod Nyasaye!"

⁵⁵Mon mang'eny bende ne nikanyo: ⁵⁶Moko kuomgi ne gin, Maria Magdala, Maria min Jakobo gi Josef, kod min yawuot Zebedi.

Ik Mar Yesu

⁵⁷Ka nochopo odhiambo, jamwandu moro ma ja Arimathea, ma nyinge Josef nobiro. En bende nosedoko japuonjre Yesu. ⁵⁸Nodhi nyaka ir Pilato mi okwaye ringre Yesu, kendo Pilato nogolo chik mondo omiyego. ⁵⁹Josef nokawo ringre Yesu moume gi nanga maler marep-rep, ⁶⁰kendo nokete e liende owuon manyien mane oseroko ei lwanda, eka nong'ielo kidi maduong' mi olorogo dho liendno kaeto owuok odhi. ⁶¹Maria Magdala gi Maria machielo to nowego kobet piny kama omanyore kod liel.

Jarito Mane Nie Liel

⁶²Kinyne, mane en odiechieng' maluwo Chieng'Ikruck, jodolo madongo gi jo Farisai nodhi ir Pilato. ⁶³Ne giwachone ni, "Jaduong', wanyalo paro ni ka ja miriamboni ne pod ngima to nowacho ni, 'Bang' ndalo adek to abiro chier kendo.' ⁶⁴Omiyo gol chik mondo orit liel nyaka chieng' mar adek. Nono to jopuonjrene nyalo biro mi kwal ringre mi giwach ne ji ni osechier oa kuom joma otho. Miriambo machien-ni dibed marach moloyo mokwongo."

⁶⁵Pilato nodwokogi ni, "Kawuru jarito mondo udhi urit liel kaka un ema ung'eyo uwegi." ⁶⁶Omiyo ne gidhi mi ne girito liel ka giketo kido e kidi kendo ne giketo jarito mondo orite.

Chier Mar Yesu

28 Bang' Sabato, kogwen mar chieng' mokwongo mar juma, Maria Magdala gi Maria machielo nodhi limo liel.

²To piny noyiengni matek, nimar

malaika mar Ruoth nolor piny koa e polo, mi nodhi nyaka e liel mong'ielo kidi kendo obetie. ³Kite ne chalo gi mil polo, kendo lepe ne tar ka pe. ⁴Jorito ne luoro omako ahinya konene, mi ne gikirni, kendo ne gidoko machal gi joma otho.

⁵Malaika nowachone mon-go ni, "Weuru luor, nikech ang'eyo ni umanyo Yesu mane ogur. ⁶Oonge ka; osechier, mana kaka nowacho. Biuru une kama noninde. ⁷Eka mondo udhi mapiyo unyis jopuonjrene ni, 'Osechier oa kuom joma otho kendo otelo e nyimu odhi Galili. Kuno ema ubiro nenee.' Ero koro asenyisou."

⁸Omiyo mon-go noa e liel ka gireto, ka giluur to bende ka gipong' gi mor, kendo ne giringo gidhi mondo ginyis jopuonjrene. ⁹To apoya nono Yesu norado kodgi, mowachonegi ni, "Misawauru." Kendo ne gisudo bute mi gimoko e tiendene, kendo gilame. ¹⁰Eka Yesu nowachonegi ni, "Weuru luor. Dhiuru unyis owetena mondo gidhi Galili; kuno ema gibiro nena."

Milome Mar Jorito

¹¹Ka noyudo mon-go nie wuodhgi dhi, moko kuom jorito nodhi e dala monyiso jodolo madongo gik moko

duto mane osetimore. ¹²Ka jodolo madongo noseromo gi jodongo mi gichano gima ne gidwa timo, ne gimiyi askeche pesa mang'eny, ¹³ka giwachonegi ni, "Wachuru ni, 'Jopuonjrene nobiro gotieno mi okwale saa mane wanindo.' ¹⁴Kapo ni wachni ochopo e it ruoth, to wang'eyo gima wabiyo timone, mondo kik uyud chandruok moro amora." ¹⁵Omiyo askeche nokawo pesago, kendo ne gitimo kaka nonyisgi. Kendo wachni koro oselandore kuonde mathoth e dier jo- Yahudi nyaka odiechiengni.

Ote Maduong'

¹⁶Eka jopuonjre apar gachielgo nodhi Galili, e wi got kama Yesu nonyisogi ni gidhiye. ¹⁷Kane ginene to ne gilame; to moko kuomgi noriwo gi kiawa. ¹⁸Eka Yesu nobiro irgi mowachonegi ni, "Teko duto manie polo kod manie piny osemiya. ¹⁹Kuom mano, dhiuru ulos jopuonjre e ogendini duto, kubatisogi e nying Wuoro gi nying Wuowi kod nying Roho Maler,

²⁰kendo kupuonjogi mondo gitim gik moko duto ma asechikou. To akonu adier ni abiro bedo ka an kodu seche te, nyaka giko mar ndalo."